

小謨觴館詩文集

小謨觴館詩集卷第七

鎮洋

葦杭集

己未迄癸亥

淮海還歸津梁厭倦弭楫茂苑授經三年繼復流轉湖  
湖佐人述譔生事益拙廓落慙歡而地不越三吳程不  
逾百里一水如帶扁舟可杭越鄉之悲暫知免矣來日  
大難姑無瞽焉自己未迄癸亥五年詩爲一卷嘉慶癸  
亥辜月下澣甘亭居士書於小謨觴館

感春詩五首

己未

少昊乘震出初日升咸池霽景何陽陽羣生迓春祺萬物既  
棣通非種宜芟夷頗聞豐隆威當先雨露施一梟與破鏡悖  
道乖天彝古王絕其類用之黃帝祠陽和雖尙德舉措政典

垂誰發白獸尊歡聲徧要綬

方朔昔挾恩顏色如朝霞王母驕不禁狡獪踞殿衙手握北斗柄碎訇掉雷車羣仙緘其舌百犯任恣夸忽蒙睥睨罪譴罰嚴相加人天有衰盛世眼徒矜誇寂寂揚子居寥寥朝槿花感彼榮落事徒倚興長嗟

閒齋敞晴旭澄慮窮泊繩讀史感閱籍善仕古有徵公卿賴關說爵賞何蒸蒸吁嗟鄧與韓系以士人稱峨峨鷄鶩冠錄錄無材能銅山旣沒入姦罪一身膺當時若衛霍亦由戚幸升折衝有戎烈躋位陵疑丞漢家急邊才兵事方繁興良無赫赫功高位何能勝

芳時盛游冶羅綺耀闐闐側聞崇愷倫富及廬兒輩屋用赤石塗手取珊瑚碎一旦入官籍奇珍卻車載善夫管子言人

滿天爲概太息踐珠人春風冷愁黛

雞人始唱曉鶴蓋走塵埃古今市道交勢在萬流仰所惜羅  
池侯乃坐伾文黨盧仝識王涯高節遽嬰網取辱由躁心恬  
衷得真賞春嵐石盤盤看雲客其往

夏日寓居虎邱禪院積雨不止泛舟山塘醉中示同  
游諸友

薜色侵簾風到樹入夏三旬二旬雨蝸涎上牆蟲作書幢影  
搖鐙佛無語傍龕木榻三脚支臥聽塔鈴山頂祠頒斌士女  
東遊屐誰家掩閣吹參差起拉狂朋向溪口拂面株株水楊  
柳采衣菱女蜻蜓舟眉語煙中笑招手波柔蘭槳生碧紋花  
簇螺窗映紅藕白點森森打銀竹風聲水聲相斷續笛牀茶  
臼聯簪裾東舫西船騰竹肉愁霖只斷插秧歌不斷吳孃紫

雲曲人生祇合生吳地旁有梨渦勸沈醉但識天留歌舞場  
那知世有烽煙事酒酣漁唱來遙村菱塘鐙火張黃昏歸來  
簷溜轉悽急倒冠落佩安足論綠章賸有一事乞辦香夜向  
通明林願移澤國天瓢手淨洗荆梁戰壘塵

漢史

漢史嚴鉤黨東京按舉幡不成鞭笞越頗望赦陳蕃下吏輕  
三尺刊章歷數番何疑墊巾者石隱老邱樊

連營

連營高節鉞奇略想風雲豈意青油幕多資白芳軍畫疆圖  
一旅掠野走千羣所貴循良吏兵農古不分

見說

見說繡旗將飛蓬上馬裙驍騰李波妹兒戲棘門軍孤憤書

何益交綏事屢聞漢家徵側在誰策伏波勲

花門

魚鳥徵殊域龍蛇發殺機花門身手健宛馬趺跽肥屢報孫  
歆捷誰堪萬福威上公會醮廟何術解戎衣

張子白畫眉圖三首

鬢華香影抱雙珠十樣紅樓譜要輪略與慈雲開妙相一螺  
皴就淺文殊

淺深端合自家知不用菱花一架支只向淨因天上証月初  
三夜卷簾時

浪絮浮萍我自憐負他匏爵好因緣玉臺閒煞成都手顰雨  
顰風過十年

子白謁選北上同人錄別於虎阜山房各以詩贈行

予得三首

青山紅袖兩魂消  
餞爾征帆虎阜橋  
一隊酒人團楚館  
六時茶板話僧寮  
舞風花暫當筵駐  
出岫雲難衆手招  
君去彈琴客彈鋏  
賸儂吳市獨吹簫

唱慣驪駒接慣歡  
此番離緒渺無端  
八叉手壓朋儕易  
七品官宜上下難  
判牘不妨遲展卷  
活人先要自加餐  
狂奴大有蒼茫感  
未肯輕彈貢禹冠

縣譜依稀少日諳  
我翁曾說茹茶甘  
何嘗廉吏難爲繼  
略恐龐官爾未堪  
相馬自然空冀北  
分符只盼近江南  
拏雲氣槩陵雲筆  
望斷梅風月一潭

題徐山民待詔

達源

家藏

國初諸老寄吳漢槎塞

外尺牘冊子

淒涼雪窖投荒客，惻愴雲鴻寄遠音。  
九死故人天一角，諸公高義日當心。  
卽看翠墨痕猶濕，尙似黃沙夢要尋。  
老輩憐才有如此，瑤華流感徧苔岑。

冰壺女史桃花春泛圖二首

碧波心裏試迴身，塞路雲霞不斷春。  
笑問樂遊原上女，鈿車何苦走香塵。  
人面明明鏡面開，此間風景勝天台。  
碧雲紅樹好生計，說與阮郎來不來。

瀘川汪五將之東河瀕行以一席容身圖索題得絕

句二首

庚申

一道香溪卜宅鄰，十年人海感勞薪。  
半氈還望宣城割，負煞靈巖草似茵。



恩門玉帳傍菱蘆

謂河帥王含溪先生

定把蒼生社席扶君去試看諸

雁戶安身都似此圖無

立厓郡司馬漢陽解組曾寫天遠歸雲圖旣而有塞  
外之行畫亦失去今旋里有年於市中復獲此畫事  
閱廿稔鬚眉宛然徵詩紀事爲題三絕句

宦海鴻蹤幾變遷懸車人尙未華顛怪他一幅鵝溪絹也受

風塵二十年

漢陽煙樹玉門笳幻夢重重闕歲華留得當年行看子駐顏  
應抵好丹砂

此日歸雲足自怡碧山深護夕陽遲玉叉不厭千迴拓勝似  
觀河皺面時

孫子瀟

原洲

以把酒祝東風種出雙紅豆圖索題戲

書二絕句

撒將情種當丹砂分付東皇護嫩芽莫誤認他紅淚點又煩  
開出斷腸花  
鷗波嘉偶玉連枝我有譚言一問之占盡兇桃仙侶福更從  
何地種相思

蕊宮花史小影冊子三首

不數人間詠絮才芳根都在集靈臺是誰看捉青鸞尾徧向  
瑤池照影來  
芙蓉城裏証香芽蕙果蘭因總一家此是人天分界處斷無  
風雨只雲霞  
十年蘅夢負湘臯惹我閒愁上彩豪不解香情解瑤怨但泥  
殘壁畫離騷

題畫梅

辛酉

略比瓊妃一笑看疎花空裏望漫漫翠禽啼後文窗掩莫有  
春人說曉寒

姜秀才

寧

秋晴訪碑圖詩三首

杖策秋山深復深叢殘文字怕銷沉分明銅狄摩挲意除是  
神仙識此心

粗沙大石幾磨治手剔苔痕辨色絲只中人間敲火用故應  
傍笑牧牛兒

曾尋雲朔朱邪墓再訪汾州拓掌痕乾隆丙午歲予在山右時事亦有淒  
涼懷古淚夕陽山下各消魂

吳巢松

慈鶴

花首携琴圖詩二首

瑤想瓊思兩不禁空山雲氣冷孤琴只應縞袂相逢者會得

成連海上心

問絹曾看嶺嶠雲羅浮涼月白紛紛豈知風雨秦松下又有山靈遲此君

時將之山左尊甫方伯任

秣陵寓館巢松以詩集見示激賞之餘爲題三詩歸之

朱弦杳誰聽樂石塵不扣偶逐麻衣羣來傾白門酒違哀逐時趨聞譽顏輒厚紛綸談藝場塞嘿獨緘口誰歟翩然來寸帙落吾手正聲鏗咸韶細響屏瓦缶黃初及正始名山斷行久精心闢其藩大力負而走想見廿年功書案不離肘拔身出裘馬尙友到韓柳塞眼羶輦兒欲享之敝帚點者亦效爲粗略涉文藪如花圖沒骨如優弄姿首嗚呼此段才當世豈無有

聖門列文學游夏皆通儒經術與詞章分門古所無史家傳  
林苑祗明所就殊究未因馬鄭上薄班揚徒末俗託大師高  
言衆說郛各負塵垢囊爭逐康成車鉏覘及點畫瑣碎兼蟲  
魚乃以呈藝事曰爲吟癡符土苴視騷雅小技輕壯夫反脣  
譏無益盍亦反本圖薄植矜立言漁獵無根株何怪淹中生  
啞啞嗤鴉塗君學而雅故絕轡文林趨典素精蘊括葩華自  
紛敷當通兩家驛以騁六藝途請一雪斯言鄙懷抱區區  
歌謠通國政所託道本崇弊由于謁徒持此夸愚蒙綾文三  
百刺往往雜詩筒買聲走豪門各取媚世工心苗人海汨千  
軸一喙同吁嗟風雅道乃墮荆榛叢今子出華閥金貂望隆  
隆曾吟日南花欲挂扶桑弓胸無竿牘撓淨掃塵慮空抗志  
慕三古平心調八風紀羣稱碩德韋平有豐功清芬隨所紹

詎以一第雄要當寶令名不朽無窮通我本歷落人降顏學  
雕蟲狂談動忤俗嬾拙成癡聾洗耳謝瑤瑟緘情托飛鴻行  
辭六朝山歸翦三徑蓬長手一編詩眼看江河東

裘可亭方伯自山右別後不見者十有六年今秋省  
試適開藩江左憫其尙未成名并勗以專力舉業旋  
以太夫人憂去今昔之感慨然於懷得詩四首卻寄  
白袍如鵠立秋風有客頻年歎轉蓬雀以倉空飢自噪馬緣  
秋瘦步難工飛黃峻望銷聲後憐綠華年過眼中不分名卿  
開棨戟劇憐昭諫困江東

記侍檐帷向九邊別來蹤跡判人天西華葛帔寒如此東閣  
荷衣夢宛然一輩傳箋秋塞上幾場沈醉射堂偏江湖斷梗  
煙霄翼變幻禁他十六年

萬人海裏自沈浮，勉守遺經讀九秋。  
挾策敢輕拋，制舉著書原只坐窮愁。  
不禁華鬢星星換，那有虛名一一收。  
未免抱山勞過慮，此生端合伴沙鷗。

曾戴金貂散水衡，新持蜺節鎮吳京。  
豈期東第承恩曲，遽送西江變徵聲。  
帶經感公談懇欵，搏沙添我淚縱橫。  
羈人心事蒼生眼，千里瀧岡萬種情。

王高詞

出所藏卞敏畫蘭屬題一枝敲風嫣然獨絕

爲賦三絕句書於幀首

敏爲玉京道人妹此幀畫於崇正癸未中秋後一日年十

四五時  
筆也

粉印螺香一尺綃，棗花簾下想垂髫。  
如何便解靈修怨，不寫東風豆蔻梢。

關心阿姊說桃根，曾著黃紵入道門。  
似替伊人寫秋照，藕絲

冠底澹眉痕

舊院風流話水天青溪紈素半飛煙亭亭一朶秋花影尙在  
恒河浩劫前

重九後四日里中王上舍昭招同人集分秀閣劇飲  
以氣味如中酒情懷似別人爲韻分得人字

有宴不作龍山賓有帽不插茱萸新空齋悄然踣壁臥起聽  
風雨驚蕭辰桂叢送香引游思如止水動波粼粼乞漿得酒  
古所喜折簡勝集叨王筠城東一閣俯萬綠水西百尺垂風  
綸邱園略似退谷退氣誼頗比醇醪醇飢盤家蔬雜鄉味拉  
伴北舍兼南鄰不知何者乃爲客爛笑都是菰蘆人傾盂覆  
斗曙達暮衆樹墨點樓鴉勻廿年江湖悵萍絮一輩酒侶團  
踈輪狂來慣登僕射榻醉吐亦污丞相茵詩壇飲社百無負



但負鄉國蒲萄春縱饒鷗盟盛盤敦難免羈緒牽鱸菰題襟  
豈料有今日許向故里雙眉伸枯鱗塌翼何暇計恣掃落葉  
添壚薪君家此地富文讌清芬奕世羅簪紳風流已杳手澤  
在各餘著述高等身恍聞鄰笛感嵇呂愁對巨筆懷珣珉枯  
腸漸酣起芒角肝膽百慮成輪囷昔賢落落天挂斗後輩滾  
滾風揚塵中間不朽誰健者胷有萬古勞沾巾狂奴貯淚不  
輕灑世見乃謂悲沉淪同儕誕言慎勿瞋清醪尙可行千巡  
檐鳴餘溜街鼓動淋漓醉墨塗箋頻作詩報謝不足道誌此  
爪跡君其珍

遣鼠詩

鼠爲穴蟲總至黠傳往籍品儕逐臭蠅戾並含沙蜮挾邪作  
姦利如禾有蝨蟹要當屋梁伏冀免銅丸擲主人有閒齋倦

遊事棲息灑掃敝十弓經帷敷片席扈斑與裘鐘各各令修  
飭不知始何年精麤窟其側卜術慙仲能鬚材負不律忝號  
中書君雄長金枷國分無憑社威粗具搬薑力旁舍窺餘蔬  
鄰厨豔殘炙耽耽歷歲時唧唧似謀畫一夕率其羣乘予出  
門隙翻騰敗瓶罌沸亂到書冊觸屏類穿墉嚙帳等裂帛祇  
期偷太倉擾及揚雲宅有若古語云室怒而市色朝來入書  
堂什器半狼籍周觀得其由睢盱肯緘默貪饕本天性爰書  
不汝劾顧予澹蕩人風牛渺焉隔奈何肆牙吻如盲昧黑白  
急思掘隧攻酷擬迎貓食或何用魚斗或燒類地拍叱呼社  
君前肅聽張湯磔鼠若跼致詞無言對以臆我儕長於斯空  
靡恣安適飲水腹期滿拱穴計誠得自子來攤書致我形畫  
匿由來盜憎主此理詎難識子書富填胸利齒莫能蝕子文

頗光燄寸目奚解測予若國狗耳遇物無不咋相撈固妄動  
見怒亦量窄曾聞千金弩輕發良可惜卽令五技窮豈復一  
錢直況未公然來對面爲盜賊推情更應恕薰逐無乃刻俯  
思迫爾笑揮手罷訶責移我繩穿牀收我韋編易逝將遠去  
汝誅茅室重闢舍肉尙有餘庭虛任跳擲舞門毋我猜裹珠  
勿報德但冀發悔心吐腸成感格請學梁簡文留塵看行跡

鈕非石

樹玉

以所著說文新附考見貽賦詩酬之

禿人伏禾肇書契八體六體塗分歧凡將已出倉頡字後葉  
剏造紛支離東京以還尤變亂蘭臺賄定人用私甄豐擅改  
籀篆法蔡邕未立光和碑爰歷博學意寢失競以秦隸淆蒼  
斯永元浚長起復古搜羅纂故追前規爲文九千部五百嘉  
量玉律萬禩垂四十五篇小學缺巋然此本懸娥義廣陵二

徐慎栞按蠲扁渠獲咸相資所嫌鼎臣羸新附形聲雖似實  
僻馳如梅姚溷尚書第如莽歆竄周官辭謙中精專墮雲霧  
小生章句誰尋窺莫釐山人鉅泊裔石室金匱窮緝披讀書  
不求公府辟癖古雅抱黃軒思細研兩漢析通借汎涉百氏  
推从滋或爲刀筆吏妄造或爲亥豕傳參差墜文本非汝南  
漏別體徒令經生疑旁稽曲證眼若月盡抉疣贅刪駢枝五  
經叔重默點首九泉騎省笑領頤吾聞蕭何草律法吏民訛  
字遭窮治馬尾缺五犬外嚮斷斷點畫爭豪釐近儒檮昧安  
積習蠶蠃神蟲小免瞽野王玉篇孫彊亂戴侗書故吾邱噲  
重性貽繆到科舉別風淮雨篇章施公卿不及漢令史坐見  
弄筆成傳蚩安得如君作正讀問左問右尊書師鈎鬚失真  
丁尾誤一一舛擿梳爬之香溪帶水載酒便僕亦來問元亨

奇

黏窗

暫作蟄居計親裁藤角箋八瓠霜練淨一色月容全野馬平  
驅影銅鳬穩繚煙吹藍風不到卽是四禪天

典裘

典裘非取酒休作鷓鴣看白粲朝炊急元冬獨暖難風霜飽  
陵轍毛羽半摧殘誰信天山路曾披七寶鞍

賒米

終覺世情好長貧不我猜宛分仁者粟免上赧王臺帖走平  
頭便香浮小甌開斗升叨大廡只被社君哈

賣書

昔作捻書歎坐驚貧病侵直同孤注事仍抱別裁心百計商

留去千函辨古今底羸梁肉客塵架飽黃蟬

曉起

龕燈半難宿火暖翠羽花冠一聲斷微聞金井響轆轤漸覺  
初陽晃朝眼散髮不簪坐深室手拓櫺窗望蕭瑟骨健全收  
朔氣清木枯淨寫天容出瓦溝一白何輝輝凍雀啅枝噤不  
飛秋冬行罰古今垂殺物都仗嚴霜威東關酸風盍來速蔓  
草當階色猶綠

讀漢書五首

茂陵雄材主威略震四陲北平有飛將罪止坐失期令嚴遂  
自殺對簿無恩私泰山羣盜起雁門敵騎馳當時郡守輩膺  
慝咸誅夷長吏戒蘊亂軍法嚴喪師偉哉元狩業景鑠夫何  
疑

孝成好經書直諫容羣賢史紀祖廟火卽在建始年繼以大  
水至京師興訛言吏民驚乘城漂流及萬千帝趣遣行舉責  
躬屢省愆亢食無失職黔黎獲安全終聞金隄塞遂改河平  
元紛紛陰陽家附會多詆譭沈災盛時有五行事偶然奚煩  
侈占驗誕說神輪篇

阿衡負隆望致主必唐堯古來靖獻事不責疎遠僚安昌盛  
經術乃列佞臣條折檻詞固激難免尸位嘲作論推范睢我  
欽李文饒巍巍帝王師比之蛇鵩妖

番係興渠田河東不蒙利楊焉鐫底柱轉令怒濤肆曲見圉  
一隅動或招疵議獨有馮都尉寒心論河勢預憂南北決戚  
戚陳封事惜費違其言四郡遭淪棄非常固難創杜患宜早  
計調錢大司農發卒河隄使緬懷疏鑿人誰師水工智

令甲懲吏貪衣食先殷阜算十方得官立法意何厚中世寬  
其途往典或藉口旣竭猗頓資遑論冰檠守亦有屠沽兒傾  
囊博章綬逮乎光和間諧價西園走司徒本穹官入財招詆  
醜慨念羊南陽清風復奚有

羸旋車歌

并序

妹聳沈五中立通經術爲用世學自疇人隸首家言以逮奇  
胥汜勝諸書罔不精心冥造洞其扁鑰間倣西術作羸旋車  
爲漑田器力省利溥什倍蛻蛇常法予於藝術懵無所知親  
見鈎繩柄悉筌緒爲援筆賦之末轉託於拙者之言以抒所  
感寫物圖貌竊自慙焉

鋟木作軸中設樞竟軸兩牆羸旋去聲如循羸繞溝水注之以  
溝激水水不知溝高偃胝軸狹廣鐵約板圍類車輞車端設



欖輪有兩一手作力轉而上萬波隨動何滔滔決湯水囊毋  
乃勞村氓色舞呼其曹天瓢功以寸枯操沈君讀書與古會  
學薄雕蟲究其大上通儀象窺天人下軫齊民謀利賴頤指  
般倕出奇捷萬頃膏腴看轉睫直抱敦農廣稼心豈鬪區區  
泰西法方今荆益猶用兵赤地千里無人耕近畿三輔復大  
水磬磬中澤哀鴻鳴買牛買犢真良圖渤海龔遂更有無語  
君奇器且勿造但聽桔槔聲亦好

里居寄懷張子白鎮番二十八韻

壬戌

茅屋東風裏金城落照邊離悰滿江國遠訊望祁連彼美當  
官乍前京占邑偏羌渾團外服并鬼仰分疆鄰壤軍需急荒  
陬雨澤愆凋殘兵貫戶糜費水衡錢撫字心難盡流亡苦未  
捐漫言金似粟莫問酒名泉往日嬉遊劇歡場履舄聯笑裁

分韻紙綏著看山鞭短李迂辛伴楊姝宋熊船六時高會賦  
一枕小遊仙出處襟懷判忙閒事勢懸交宜審通介政貴達  
經權黑水鳴沙靜紅鹽受露鮮應刪才子氣細鼓武城弦我  
抱漳濱疾空攤博士氈憶曾偕蔣濟昨歲送張騫躍馬橫戈  
地流金爍石天奇懷收嶽瀆薄宦狎烽煙共祝封豨隊全消  
飲馬川花須鈴閣媚月盼玉門圓蘭譜人三五榆關路八千  
音塵曠遐問裘葛又經年臯廡傭書罷文園聽雨眠勝儕疎  
二鳥華夢冷三鱣思轉迴腸數愁循短髮宣飛奴如有意傳  
札到居延

寄李洪九汝川

憶別李生久十七易寒燠迢迢敦題山望望婆娑谷三五少  
年場健若兩黃犢家君宰邊郵賤子侍車轂武州及管州相

去祗信宿君方登賢書蹇驢走僕僕執經拜我翁論古跋宵  
燭予時止坐隅出語間超俗虛衷愛忘醜動輒低首服以此  
聯襟裾暇還學馳逐摧蘆朔風獐壓雪塞草禿衝沙鞭驕蹏  
踏月拾敗鏃君才十倍我墳典若夙讀論文推董賈決策愛  
隨陸性不喜詩歌強作難滿軸斯事性獨殊餘皆契衷曲自  
從賦河梁南北隔川瀆羲娥賓送老荼蓼遭逢酷變遷君無  
聞但訝霜露速記在上章歲春明郵短牘時登進士第恨未  
入講幄謬以鳳凰池期我才樸櫟爲道秋榜開江南值鳴鹿  
聞呼千佛經立市闕反復我名了不見南望成一哭此語又  
數年依然歎蹉伏昨來枉函問報我官巴蜀上言烽煙危戎  
馬勢草蹙下言貧病身膝下乏嗣育猶意吾翁存紅箋通問  
肅悲心觸前塵到眼淚簌簌我聞汶川地縣小鄰蠻濮侏儻

種睢盱岷峨氣慘黷土官分治之異類煩教督藩籬仗維州  
孤城控蕃族冉駝或有變草坡足可蹴南人幸遵度贊普就  
羈束要令夷夏安卽是長吏福川東蹂羣盜如帛少完幅君  
邑西南偏應免兵燹毒所憂軍興繁供支勞令牧將無形神  
瘁可得縣譜熟蠶叢耗茫茫海角思翼翼善保千金軀勿薄  
升斗祿軼材防喜事阻勉守成局逡巡邀上考高舉隨鴻鵠  
萬一來江南勾吳樹旌纛春歡墜還拾前夢斷重續蒼涼話  
升沈瑣屑追往躅豈非奇因緣喜心翻倒足作詩拉雜言故  
人無他祝素懷爾當同請向君平卜

寄蔣賓嶠

寅時試令湖北

楚稱吳蜀脊北漢南沅湘承平百年來殷蕃甲三江貨幣走  
大賈艫舩輸香杭江山快清宴仕宦號樂康蘊孽自何時亂

若川潰防發難首房竹傳烽達荆襄連雲屯戰格吐霧紛妖  
芒薄海盡赤子何化豺與狼推原慨焉興事非關廟堂始惑  
福田說穰穰聚愚蠢此責在長吏化導消其萌乃復誅求之  
百端難具詳計窮鋌而走奮臂成螳螂轉鬪數寒暑餘氛蔓  
雍梁游魂究安逃所歎勞斧斨此邦近蘇息流庸漸歸耕千  
村萬落間應有桑麻生獨愁凋劫地難遽謀蓋藏昔苦阨刀  
兵今苦無衣糧鳩形半頑獷鴻雁充城鄉撫循倘失道殷憂  
浩茫茫蔣侯盛儒術讀書薄申商粹若玉界尺翩然鳳鳴岡  
捧檄試爲今年時飭行裝一奴履箱敝三板風帆颺去食武  
昌魚待綰銅墨章鰕生善迂闊諛頌非我長頗祝早當官匪  
曰求令名願以今吏事學作古循良銷兵鑄鉏耒闢地招散  
亡休養貴清靜寬嚴慎弛張爲功不在大豈必樹麾幢活人

一亦得况領百里疆當今涵濡澤在宥均寰瀛側席求卓魯  
言利斥孔桑展施此其會亮哉副所望佇復盈阜象永息呼  
譽聲不圖錫緹油但冀歌蟹匡上敷醲釀化下爲吾黨光長  
吟春陵詠遠寄樊山陽

寄尤二娛滇南二首

鷓鴣聲斷渡牂牁萬里官程意若何詞客向來輕瘴癘蠻天  
差喜偃兵戈全消其雨朝陽怨二娛眷屬同行細唱山花犵鳥歌祝  
爾宦成東下早三吳迴首白雲多吳中尊甫留  
石交數子成遙憶南別張譏北李堂謂子白洪九傲骨摧眉叩坂  
峻衫豪收燄玉關涼八行遠訊虛山驛一輩才人又夜郎愁  
說屋梁顏色在晨星零落月荒荒

野外觀桃花

一色笑嫣然江南春可憐意行忘徑曲薄醉戀風前流水好  
村落袂衣閒少年亭亭無限思偏在夕陽天

首夏作

里黨罷招邀炎官勢漸驕簾波蕩花霧風色上蘋蕭引手圖  
書便隨心食息調一般小年日只覺易昏朝

一笑

偶然閉門學清靜便似壺邱杜德幾苦爭浮譽究誰是不鑑  
往哲安知非哀貽節容舉國慕餓鴟啄腥作態飛散人一笑  
對寒綠鶴骨自古何曾肥

不分

不分里居久了無鴉雀聲彤彤徂日影細細數勞生孤抱足  
霞想纖兒任噉名暫時安蓼苦便欲傲長征

節物

節物衡茅下星河酒盞前勞人原意外明月指天邊深樹覆頭碧孤花流笑妍祇愁桃梗似終要泛長川

放言三首

古今茫茫事萬端腐儒岌岌高其冠許身稷契談孔孟雜以黃老兼申韓規圓矩方事錯迕局外疵瑕局中苦不當其任聊自嬉有酒且復斟酌之臨觴俄然慘無懌此意千秋幾人識

東家出遊裘馬都西家張宴喧歌呼蕭然中厨路人怪頗怪此屋炊煙孤衡門兩板如空谷獨抱遺經雨中讀有時呶呶上北堂有時蹠蹠行空廊寥寥寂寂慎勿歎不學那得長飢寒



三寸弱翰千秋名咄哉欲與萬手爭不愁與古離面目所患  
與古離神情手磨明鏡自照影獨立蒼茫少人境世眼嗤點  
皆尋常譽我我轉心爽傷長庚高高向西指嗚呼男兒技止  
此

### 悲來行

出亦悲入亦悲悲從中來人莫知不悲雲飛與泥伏不悲行  
尸兼走肉悲莫悲乎佩玉長裾趨不利白黑元黃顛倒易朝  
爲嫫母夕爲夷光啾啾欽鴉欲儕鳳凰下士笑徹蒼蠅聲吁  
嗟奈此衆眼盲眼盲安足怪一事未解悲填膺東鄰有鏡雙  
盤龍曷不自照蓬壺容

錯刀圖歌爲錢同人

何作并序

嘉定錢子同人承其尊甫可廬先生及世父竹汀先生家學

覃研文字旁逮吉金樂石所遺性嗜古錢蒐羅尤富著錢幣  
攷若干卷間取張平子美人贈我金錯刀詩意繪圖索題爲  
賦此詩

黃標紫標奉驕王十囊五囊入棗郎銅山迨壁等聚穢抱丸  
舉眼多蜣蜋世間風漢乃有子直視泉刀作圖史鑄幣上溯  
商周秦譜錄旁蒐董洪李苔花土暈紛鏘然古香摩挲衆製  
妍市兒傍瞰或大噉爭抵三百青銅錢天涯同調誰殊俗絕  
代蛾眉在空谷繪圖略比瑤華貽卻立嫣然鬢雲綠素心名  
士託傾城河間姹女空滿簾千秋斷壁零珪意一種明珠翠  
羽情書生結習真無那貯篋開元半規破狂思平子報瓊瑤  
侈擬班生談食貨展綃笑與呼真真別有閒愁賦感春一个  
金錢是誰擲年年祇解卜離人

冬日客三泖漁莊卽事九首

一櫂經珂里連旬住  
蠶窩尊鱸秋興少  
峰泖夢游多  
偶撥書叢去閒來  
稻壠過黃雲空萬頃  
索米奈愁何

墟落枕湖干  
炊煙懨懨看戶繁  
罔販簡地狹水雲寬  
客味疏慵稱人情  
樸拙安此邦風豈惡  
祇覺損清歡

舊熟康成里  
今窺寫定書  
琳琅羅寶刻  
東宋勘鈔胥  
大擴鄙

陽例能無夾  
際疎千秋歐  
趙外此錄果  
何如述菴司寇輯金石萃編

河岳英靈氣  
騷壇揚闡功  
雅材搜衆妙  
元賞屬宗工  
廣奏盈

庭樂誰當大  
國風關心修  
禊序不入選  
樓中時方佐校湖海詩傳及續詞綜

書二

續輯花菴選  
渾彈錦瑟弦  
中音競韶濩  
下里濫金荃  
小技工何用  
閒情賦偶然  
名山餘事夥  
未敢逐羣賢司寇輯琴書樓後二十五家詞

選欲濫列子詞子力辭之

獨出昆明劫黃門一集新乾坤悲板蕩風雅掃荆榛巨製丹

霄麗疎鐙綠字親雲間宗派在尸祝可無人

秀水朱氏近刊陳黃門全集司

寇屬子校勘一過

不薄齊梁作文章本一塗羣公排八代塊獨練三都繡段機

空織幺絃調益孤陵雲知庾信除却少陵無

司寇見示詩有文章流別君須

記可與齊梁作後塵之句

那比高齋士虛圍八萬籤才誰辨鴉鳳窗易度烏蟾夜燭書

功損秋花酒債添茂陵扶病客聽雨鎮愿愿

頗愛錢公輔

謂同人

分明鄭益恩及書筠管健樸學禮堂尊疏

薄雕蟲技殷勤嗜歛言通都寧望布此意重璵璠

同人數勸予刊刻詩

文子深愧其言然足感也

泛澱湖

癸亥

春暄蘇芳臯理楫越曲汜冥際一塔明霞邊數峰紫初行綠  
葦蘆修坂被蘭芷忽啓大圓鏡四顧絕涯涘藍拖高穹合素  
引長煙起空明拓虛襟浩淼怯遐視水鳥飛渡艱但訝翼不  
駛遙遙兩三帆太虛點微滓澤國通瀛壖灌輸利攸恃陂渠  
擅田更蒲稗足漁子涼生袷衣單曠入野情喜唳鶴不必聞  
網鱸從此始

曉渡白鶴江

幽夢破鳴鷗披衣泝煙垞蒲牢斷遙寺漁火留一星露華篷  
背泣山色林端青初日出不高霞光遠亭亭閒鳬嬉晴藻浴  
鷺翹沙汀上已罷褰遊蘭洲寂揚舠微波靜川后冥想感洛  
靈前溪芳杜若無言送餘馨

余山

初陽媚長川，霽景暢春目。  
挈侶陶嘉辰，漾舟入雲谷。  
落落蔭澗松，離離緣坡竹。  
微颺迴煙蘿，巖壑爾衆綠。  
時當嬉遊社，昌丰炫袿襦。  
山容不世情，人海自娟獨。  
采茗企單椒，棲貞繙遐躡。  
巢居杳綦跡，塵網悲局促。  
疏麻折遺誰，瑤華寄焉屬。  
渺矣邱樊懷，歸橈盪湖淥。

家人病三首

不緣貧薄怨朝霞，小別經春病轉加。  
紙閣梳奩清比水，薰篝衫袖靜當花。  
人拋螺黛眉痕淺，閒搦鷗波字腳斜。  
誰識前袞好時節，藥爐煙裏度韶華。

尙戀寒輝月似弓，歸人低絮小簾櫳。  
門扃翠羽雙棲後，春在梨雲一夢中。  
未了癡情圖采藥，易闌芳序悔飄蓬。  
良宵閒煞

紅蕤枕自拔鸞釵剔玉蟲

惄惄離合幾星霜閒數諸姑伯姊行各羨驕兒攜阿袞并無  
小女字平陽桃人土梗征夫倦夏簟冬釭子影涼弱骨近來  
增百感蠶鹽心事尚尋常

子體素強年三十後乃多疾苦春夏之際客游暫歸  
婦病小差予恙復作得詩二首

慙慙秋蟀復春鵬百疾何當壯歲嬰嬾骨坐看生髀肉雄文  
渾怯鬪心兵漸諳禪榻茶烟味頓減花天酒戶名不信飛揚  
驕非日解騎驪馬白狼城

罷卷湘簾罷倚闌綠窗人對袖羅單同孤蘭勺春三月互析  
刀圭藥一丸理帙任教逋券積薰香忘卻爨烟寒獨愁南浦  
傷離易如雪楊花不敢看

徐山民待詔以其內子吳珊珊舊題拙集詩遺墨緘

示感悼之餘輒題二詩於後

珊珊詩作于己未春尺

未之知也悼亡後乃於篋中檢得寄于子既作詠詞復成此詩

纔展生綃便泣然彩鸞遺札墨痕鮮吟當睡鳴銷香夜句賞  
明駝出塞年斑管風塵花黯澹綠窗煙素語纏綿中耶寂寞  
桓譚少腸斷芙蓉鏡檻前

琅璈聽徧愛弦匏尺絹題詞手自鈔蓬累苦將羈士惜蒞函  
遲倩玉郎交三年繡段香猶在十斛珍珠淚共拋只合萬重  
緹縹護莫教塵篋網蠨蛸

原作

吳江吳瓊仙珊珊

遠遊小小出居庸無數青山避筆鋒駿馬一朝辭白傳集  
有賣霜風五夜警黃鐘熟精文選難名體羅列星辰有此



胸歸向伯通橋下泊高歌愁煞讀書傭

每因夫婿手鈔時讀徧彭宣絕妙詞嘔煞心肝愁血少淒  
如風雨總情癡深宵常與一鐙共落筆便求千古知多少  
書魚誇食字不成仙去是凡姿

書湘蘅女弟畫扇

巖棲卅載計蹉跎勞爾麋丸寫黛螺若論船屑驢背上青山  
如此見原多

見秦鸚鵡者

重海層巒夢已非一身文彩誤虞機問渠香稻能多少也要  
金籠絆雪衣

得吳巢松嶺南書卻寄五十韻

澤國盟鷗鷺同心散鰈鯨瑤華緘短札蠻驛走長髯蕙芷香

盈握珍珠字滿奩流光嗟激矢彼美憶蜚穢往歲刊章下尊  
公錄牒嚴檻車微騎促貫索獄星占北寺晨昏隔南冠涕淚  
漸鷄竿勞盼昧狴戶數窺規塵忽天波洗朝看謗口箝吉玃  
書未上朱穆澤先霑終免椒蘭慨全消蕙苴嫌磨銅瀛海碧  
潑墨瘴雲黔籌筆戎軒贊從軍樂府漆士隨貔虎壯刀淬鸛  
鵒銛露布趨庭草霜豪倚盾拈儒衣更韞韞詩卷雜韜鈴犀  
角英姿厲鯨牙醜旅殲地重臨榮戟君摠侍帷幃識以艱虞  
進人仍福慧兼風霜才益老嶺嶠夢初恬鐵石雙虹影羅浮  
兩玉尖定能談馬槩寧止唱烏鹽賤子輕萍泛漁莊匝歲淹  
選樓叨點筆芸館坐鈎簾鄉自蒲魚足身悲絮蠶黏工夫拋  
緝柳文字絕酬兼夏飲杯常涸冬爐火不炎蕭條炷金鳴孤  
迥望銀蟾篋行開元結琴心辨麴瞻何曾諳月旦謬許審洪

織談藝途原廣披沙意未忼  
眸常混珠礫材慙屈梗枿玳瑁  
裝千架琳琅擁萬籤徒慙神索  
索虛度夜厭厭理曲難諧聽  
埋光只守謙家還愁菽水病或  
間痾店鶴瘦慵軒翥蟲寒少  
覆苦真成過宋鷁大類上竿鮎  
野叟撈蝦艇村農刈稻鎌夙  
懷都負負殘鬢已髼髼沉芷思  
公子吳船盼孝廉良書需賞  
析疵句待鍼砭歸說三秋近期  
應六日詹何須欸東閣相與  
訪西崦黃葉看山路青旗賣酒  
帘江橙搓手嫩厓蜜餠觴甜  
醉裏堪交蔗狂來學舞秋幾時  
聯白社鎮日賦蒼兼夢想雲  
龍逐心甘霧豹潛遙吟寄元九  
斜月下虛檐

寂寂

寂寂齋庭隙影馳挑鐙又到夜  
闌時德星太史何嘗奏國士  
中行恐未知摒擋叢書拋綺夢  
經營村酒對花枝紅薔一丈

簾垂處寶箔當年有所思

獨坐

此生豈合注魚蟲獨坐芸籤藥裹中疎密隨時梅子雨高低  
無定柳條風神仙許掾家何有人物班書論未公只擬襄陽  
求水鏡便從王粲記英雄

書寓齋壁

病身枉住水雲鄉掩抑摧藏祇自傷掉舌早拌輸吉了守關  
何策學顛當向來執技文章賤信是爲農氣味長悔煞五湖  
三畝宅當年容易棄柴桑

漫感

長簷高屐滿州間賦手詩才錦不如誰以先鳴憎盍旦儘聞  
大饗到爰居儒林豔說張雕武達士譁傳謝幼輿爭怪草元

亭上客寂寥甘守一牀書

山塘

繞隄風柳尙珍珍有客同來駐錦帆簫譜細教車子拍酒籌  
嚴付雪兒監臨波水榭輕紅幔隔岸春人澹墨衫回首碧雲  
天際遠寄愁何處覓魚緘

雨

颯沓繁聲到畫闌疎簾清簟午齋寬坐看翠篠含風淨斗覺  
香羅疊雪寒六柱清游拋雀舫一蓑生計羨魚竿白鷗盟冷  
煙波濶始信江湖浩蕩難

聞秋風

戛亂湘簾翡翠鈎夢迴敲枕聽颼颼久忘玉塞鳴鞭路料長  
金錢賣酒樓殘葉任教三徑滿秋衣先替一家愁不知南浦

驚寒雁淒斷心情似我不

鉏非石至三泖漁莊集飲履二齋分得有字予於流  
連光景之碎置不作者多矣敦迫之餘不能自己輒  
得一百六十字

嚴辰客蕭齋鏟采坐文藪宛居鳴鏑羣獨袖射雕手頗愛山  
居翁靈威丈人友寶書讀百二雲夢吞八九磊落注蟲魚覃  
研審穀穀偶停漁莊舫共翦西園韭興酣潑金壺樂作拍銅  
斗餘事復秀出琢句盡瓊玖乃以螻蛄詞徵及牛馬走予慵  
百無賴技小顏自忸矧敢學吟癡隨例供覆瓿所憐盍哉事  
雖暫亦非偶聊爲鴻雪志濡墨羣賢後菱蘆作飛雪星月動  
高柳過風索前林寒意入虛牖且當食蛤蜊妍媸復奚有

凌公祠詩爲徐山民待詔作

并序

吳江黎里鎮有故明太常寺少卿凌公祠墓按公名信字尚義以楷書授中翰憲宗時曾偕行人邵震充冊使見明史安南列傳迄今三百餘年子姓陵替祠墓日益傾圯山民待詔特重葺而新之洪稚存編修亮吉爲作碑記予系以詩

一代清卿翠墨留遺墟零落舊松楸雞林有口銜天語馬鬣何人問故侯栗主香烟新丙舍蘇碑風雨訪庚郵南州高義鄰陽筆同付中吳志乘收

陳叔理亭角尋詩圖

蒼苔翠竹何娉媚梅花數枝寒可憐詩人似與詩有約繞徧夕陽亭一角吾聞作詩無定境清妙天機在人領流雲片片春蓬蓬口不能言心自省

東坡句

又聞索詩如索逋好景一失難追摹百思不到俯拾得極閒處有忙工夫半生淺夢濃香

裏况說閨才左芬似閉門吟出同聲歌傲煞卿家老無已風  
塵迴首車斑斑勞人我漸凋朱顏向來亦有尋詩處只在長  
牌短堠間

吳門歸途阻風真義作

我昔渡揚子半日輕帆三百里今來婁江東一舍可抵蝸牛  
宮世間快意不可再事變常生思慮外獐麕卷雨欲撼山汀  
樹折腰齊下拜平時此水一葦杭驚見白浪高桅檣春秋吳  
越本弱國得勢遂欲肩齊梁榜人停橈閒袖手我嗔渠慵渠  
不受同求速濟奈力何心是其言口否否烟村蕭條晝欲暝  
八扇符簷目空瞪神焦意倦卻翻然小忍何妨待其定濁醪  
貰醉且掩篷醉餘一語箋天公不阻行人阻歸客石尤風外  
此何風



近日刊詩集者紛紛予心非之而友人中有許出資以佐剞劂費者恐異日不能堅持初志料檢之餘漫題四詩於後

不求元晏先生序不要東林佛院交只與同心二三子一鐙風雨省傳鈔

厭談風格分唐宋亦薄空疎語性靈我似流鶯隨意轉花前不管有人聽

便道詩工豈是才任人嗤點任嘲詆此中不築堅城守敵騎何妨八面來

十三齡把四聲研三十頭顱自黯然一檢緇囊一搔首過來無限好華年

書陳永齋觀察

初哲

采蓮圖詩遺墨後

以下補錄

當年仙籍領霓裳偶賦閑情上研光日下才名留彩筆鐙前  
殘卷認青箱淒涼蓉鏡人千古零落珍珠字幾行說與郎君  
好調護藕花香裏有書香

令嗣兆賢  
受業於予

花燭詞十首

非序

茂苑絢春蘭房宜夜華鐙九枝九月三五潁川生有帷幕之  
徵泉叩之聘爰招俊侶啟琉璃抽觴定情捧豔出拜釵挂袂  
拂簾開酒香徵靈簫匏爵之辭當華鋌疆環之贈佼人僚兮  
能無言乎事紀一宵數符十索傳觀彼美其粲如焉

采旛珠瑄闔閭城風送雲車下六萌一掾香溪九髻女畫堂  
扶入倍盈盈

圓月當頭鏡掾指流光低擁牡丹鞦廣寒八萬三千戶齊向  
紅樓看上釵

乍拋歌豆嬋雲翹好把同聲曲譜調我替小紅先色喜可知  
夫婿會吹簫

省識郎才玉不如黛眉情愿畫文殊美人方寸星河在不要  
珍珠要慧珠

夜明簾子卷瓊鉤親向金堂拜莫愁一朵妙鬢雲影下酒龍  
詩虎各低頭

新詞醉拉蔣元卿意蕊心花各怒生奇絕畫眉窗六扇五更  
齊放讀書聲

飛牋擊鉢紫蘭叢身在濃香淺醉中百尺樓頭才子氣吐來  
都化美人虹

阿儂消瘦倦花顛色界刪除兜率天恰似東坡蕉葉量但看  
人醉也欣然

金局牢與護文窗翠隙紅深輒語雙八尺龍鬚好儀態只難  
瞞過小銀釭  
人散珠櫳漏數催碧雲迴首鳳皇臺只愁歸夢春魂繞又化  
紅襟燕子來

衡笑軒游仙詩三首

御風御雨御飛煙萬頃銀河十丈蓮穿過市垣星九曲碧琉  
璃現小情天

白榆斜間碧桃枝瑤圃耕煙問導師帶得人間紅豆子漫天  
都與種相思

明明抱月坐瓊樓歷歷星辰綴釧頭偶撥紅霞成一笑下方  
梅雨滿蘇州

小謨觴館詩集卷七

小謨觴館詩集卷第八

鎮洋

觀濤集

甲子迄丙寅

枚乘七發廣陵曲江竹垞朱氏斷爲錢唐而韓愈文注都近汪明經中述學外篇又爲申駁要其說不足詘朱也闕逢青陽子抱幽憂之疾鍵戶半年秋間辱邗上當事之招托舟渡江繼乃代舍移牀東閣嘯侶文酒之會沈痼爲蘇跡非等於掃門事有同於發疾間復弄筆聊錄於編後所得詩排日以附觀濤之語義取於斯明知踵訛不遑計矣嘉慶甲子涂月下澣甘亭居士書於小謨觴館

葑溪舟夜用康樂石門韻

甲子

小謨觴館詩集卷八

篷鼓宵露塗燭滅暗蟲歇衿衣生微涼光逗前浦月搖煙叢  
杉吟隔水櫂謳發送籟紛諸妍激神領超越德機吾自杜性  
斧人誰伐黽勉辭塵轡汨流弄落髮

吳門晤巢松時歸自嶺南

玦判璋分感百端三年離緒話更闌文章殘錦臨風倦家計  
新絲糴穀難庾嶺梅花煩報問珠厓烽火祝平安好將朱鷺  
鐃歌曲譜入牙琴續續彈

積雨排悶

森森銀竹矮檐捎風攪林於鎮日敲黏壁涎蝸添古篆墮泥  
梁燕失新巢寒鄉饋問貧都廢小技詞章嬾并拋聞說潢汙  
斷行路趁墟無飯綠荷包

盛夏積陰愁霖不止觸事成詠六首

曉枕宵窗曉不交如麻雨脚透重茅幾曾禦溼儲山鞠難免  
因人賦苦匏槐葉冷淘供七箸芥舟兒戲開堂均長官空做  
江都術赤幘朱絲徧近郊

市頭紅粒貴瓊瑤難得炊煙一縷飄持節有人謀發粟閉門  
無路可吹簫山棲霧豹文焉用腹疾河魚骨漸銷枉欲占年  
論星次重霾何處指元枵

慘黷元雲壓海濱千畦百壠半漂淪處堂燕雀棲原暫起陸  
龍蛇事恐眞辟穀要求餐石法弭災誰作徙薪人無愁剩有  
魚蠻子舉綱朝朝獲巨鱗

雕青惡少里東西豪右困倉競取携對面公然爲盜賊磨牙  
何必定鯨鯢民瘼自仗鄉閭恤俗獷難憑法令齊貫索繁星  
明似月尙煩流影照窮黎



言角集言卷之二  
槍纓箭羽令重申下瀨戈船命將新米賊遙聞殄張魯水仙  
終未縛盧循昆池練甲能無戰漆室憂葵大有人身近扶桑  
東畔住永銷鋒鏑祝波臣

悶拈筠管走蒲盧  
牖黑常須命燭奴  
點鬼簿餘殘葉在活人  
書笑寸權無驚看通犬  
鄰牆塌慣聽生蛙竈婢呼  
近學逃憂方法好不妨小  
事儘糊塗

### 病述七首

百病侵盛年  
羸體臨衆敵  
備此彼或來  
無方若飛鏑  
略知軌道腴  
寧復憂淪寂  
所惜志業乖  
流光消踢壁  
階前決明花  
顏色妍可摘  
莎鷄獨何事  
牆角愁唧唧  
生世當秋風  
安能無歎息

弱齡薄科第  
謂若摘領髭  
不憂青紫艱  
憂在難副之  
及乎屢

顛蹶心嬾氣亦衰浮榮究何益或博親顏怡高堂逝不畱縱  
得將奚爲秋風吹省門二豎忽予欺倦客病亦得隱几聊支  
離不材甘散木此意蒙莊知

浩倡倚市門俗眼誇妖麗嬌施閉深帷盛美或淪棄匿秀邀  
譽難呈身博名易吾生憚馳逐嬾拙行一意聲華煊赫流縞  
紵無諧際微名偶牽引坦率滋衆議進退成兩歧虛聲竟何  
濟終當學君平寂寞老身世

夙性拙生事不知有飢寒中年家壁立始識升斗難當其謀  
慮絕未免俗念干造物遞生機往往來無端境過輒又忘一  
飽聊自寬代草憂春雨前賢警癡頑冥心乃善術前路良漫  
漫

吉凶視惠逆禍福論感應奈何得不得輒復稱有命聖賢持

兩說道實無偏勝理在數斯在鬼神亦從令轉移卽數使無  
定仍一定寄謝塵埃徒無爲鬬心競

吾儒論天壽十二萬年耳阿含侈億劫要亦有所止古今言  
不朽動以天地擬天數有窮時終無久存理偉人冀豐功腐  
儒鑽故紙各驚沒世名恐蹈不稱恥達士旁軒渠疲精可以  
已旣遜毗騫王混沌長不死何如學劉阮沈冥送餘齒  
前史志藝文千古著述藪自漢迄唐來十每佚八九想當著  
錄初傳寫或萬手不及千百年飄風掃塵垢如何輒生見猶  
欲享敝帚萋萋抱寸衷切切謝良友立身了無藉傳世事奚  
有志士喜思慮意寄亦云偶所圖送春秋遑暇計妍醜并此  
而無之吾生更多負

爲人題西域詩草三首

聲當太白金方肅天覺中華界外寬不道詩人似飛將成功都合到樓蘭

曾隨都護獵黃顰浩唱龍沙古戰場可惜陵雲好才調屬車無分賦長楊

廿年前記走明駝我亦聽殘勒勒歌一樣隴頭鳴咽水料應分與淚痕多

曩在寧武曾至鄂爾都斯左翼界

邗上卽事柬曾賓谷都轉

二首

無計西風息羽翰片帆隨雁又江干孤雲自信飄流易今雨終愁浹洽難秋晚征衣霜裂縫病餘心力井無瀾摧頽且下

南州榻怯向騷壇問敦槃

秋間嬰疾初痊張古餘太守敦仁見招郡齋小住

嬾性生愁戟府趨枉煩名姓記菰蘆掃門我敢輕殘客漫刺公應恕病夫白雪調高羣雅掩朱絲弦冷斷音孤文章光燄

真靈業可許飛霞乞佩無子初至邗上以病癩未遑修謁而吳自庵廣文照樂蓮裳孝廉釣數

道公延岑之雅子滋愧也

題襟館分詠先賢畫像予得二首

代易元嘉號詩畱正始音桃花身世感秫酒聖賢心黃綺貌猶在荆高悲獨深誰知填海志歸鳥是冤禽

右陶靖節像

常山舌何在太尉笏無功日月同標節鬚眉復拜公握拳猶鬱鬱藍面枉奸雄應共臨池寶滄江夜貫虹

右顏魯公像

錢獻之州倅站歸漁圖

蘆花吹雪一江寒老向煙波把釣竿百二關河拋簿領九千文字訂叢殘何妨柳肘書仍健時右臂以風疾廢用左手書省識蒲輪夢

已闕只恐問奇人不絕翠綸閒煞驚鷺灘

明宣宗恭讓皇后賜印歌

并序

印方徑一寸三分象牙爲之陽文篆厚載崇教之寶六字鉗作相輪形左右分鏤真書宣德四年正月賜靜慈宮十字故明宣宗胡皇后御用章也按宣宗時孫貴妃有寵陰取宮人子爲已出而后未有子三年春帝令后上表辭位退居長安宮賜號靜慈仙師別冊貴妃爲后史稱后賢而被廢天下憐之帝後亦自悔曰此朕少年事斯印之賜乃在四年則猶初入道之時歟古餘太守得此印於嘉禾曹氏屬予作詩記之因成長句

朱礬麝酒餘香漬桃花色映迴鸞字牙璋小璽出中宮宣德當陽四年賜宣廟中興似成祖沛上徽章陰鄧伍

后濟寧人

玉燕

初徵瑞石祥穀圭曾作長秋主高徐家法在椒房任姒周旋  
禮數詳豈有斜封譏墨勅定膺優眷選名璫君恩一旦難常  
保高禩弓鞬勞祈禱鈎弋旁開堯母門璿宮不長宜男草鞠  
衣教卸著黃紵別有昭陽寵渥多蘭殿金人拋手鑄上清琳  
札自摩抄沈沈永巷佛香吹聖善威姑早暮隨謂張太后差勝寂  
陵悲乙弗不須雲母羨昭儀此印傳宣出至尊九重深意表  
丹文修真已改披香號坤德還畱故劒恩迴首娥臺只三載  
金螭虎鈕叨封拜中壺長辭鐵字書天章枉熟紅牌誠瑩質  
蘭函伴幽獨筆牀硯匣隨簫局斗檢塵封女史箴芝泥但印  
長生籙覩眼滄桑劫灰燼遺珍流落當璫瑾織室昔塵蔓草  
荒麻姑爪跡依稀認玉勾斜畔月纖纖高館淒風閃軸簾莫  
同團扇捐秋篋畱向長門賦上鈐

同作

南城曾燠資谷

金寶冊妃前所無華陽况已刻玉符皇天不祚元后璽牙  
璋頒瑞將奚需往時翔燕銜白石吉兆常擬王家姝法駕  
方乘畫雲母賀儀或用青珊瑚月令祈禱每帶鞞電光占  
象宜繞樞桂花不實果何罪葛藟相縈翻見疎故事宮人  
近乘輿年月皆有中官書未知無卹誰氏產一任不韋奇  
貨居讓賢援取光烈例入道改作仙真呼人集於苑已獨  
枯存問永巷胡爲乎忽鐫片玉茗華字不減一斛樓東珠  
象掃祗宜摘鬢髮或爲牙簪承歡娛文章乃取贊坤德此  
日豈復能堪諸長門賦又無相如執扇詞亦非健仔何須  
斯印鈐紙尾色與紅淚同模糊獨惜宮中鐵牌在從茲家  
法變國初萬妃藥中孝宗頂選侍肘掣熹宗裾茄花委鬼



更交煽懿安賢后幾被誣當時誰進閨範圖印記虛語徒  
區區宋有仁宗亦令主同斯慙德堪嗟吁

揚州郡齋雜詩二十五首

昨打橫江艣一枝斷風零雨葉飛時工愁慣讀蕪城賦不解  
嬉春杜牧之  
過江名士多如鯽我是看花最後人浩態狂香零落盡芙蓉  
雖好不成春

維揚劇郡雄財賦太守清寒似我曹絕學九章都探徧只輸

能吏算泉刀

古餘太守於學無所不窺尤精算術

衙參喧不到賓寮官鼓遙遙隔麗譙一樹梅花二分月儘人

風露立中宵

予所寓齋在那廨最僻處

牙籤壓架萬琳琅官閣新開六一堂我有貪心同脈望神仙

三字要分嘗

太守藏書最富於郡廨東偏葺六一堂奉

寓公杭

大厲樊

道山去別館

玲瓏碧

薛滋

馬氏秋玉

黃河樂

府旗亭曲

此是開天最盛時

名卿花底出行厨十二金屏萬燭奴偷向斷垣荒甃畔自循

涼月認煙蕪

寶谷都轉招飲虹園丙夜始罷

紫煙宮殿草痕青敗瓦風淒九子鈴曾是轉鐙珠樹地冷螢

畱焰一星星

借都轉泛舟歷游平山諸勝

酒兵駒父氣陵嶢覆瓿文章荷寵矜他日雕龍果成帙不辭

先質沈吳興

虹園酒次昭洪雅存太史極稱予駢體文不知何處見之也

午夜細吟茅屋集

詩都轉所著文集名

窗鐙如豆雨聲催旃檀香與林

檣味那許荒僮驟領來

生愛西江樂元淑

蓮裳

清才花骨綺情深如何縱酒酣歌地都

是離騷屈宋心

繭紙蕉心寸寸抽心肝何苦費瑯鏤彭郎磯與劉郎浦兩樣

風波一樣愁

謂劉英初孝廉嗣緒

文中著書敵惠施壯歲聲華日下馳誰知跋扈詞場客也到

觀河皺面時

時王惕甫國傳芭孫以所刊詩文全集見貽

臨川曲子金生擅絕調何哉嗣響難也抵貞元朝士看班行

耆舊漸闌珊

都轉解中觀劇時吳伶金德輝演壯丹亭為南部絕調年已老矣

吳郎落解出京華碧海詩才跋浪誇鯁壑烽煙無恙否阿誰

真个掣鯨牙

巢松自都門歸過揚州小住將往粵東

李翁天學繼梅翁

李四香銳沈五立中

術不及河間姪文工

玉雪清神沈氏甥相隨形影劇關情文章他日須歸汝善飯

劬書速長成

四甥秉鉦隨中立讀書郡齋時年十三

異書讐盡宿羅胸奇士端應讓顧雍亦是諸侯門下客太阿

秋水要藏鋒

顧淵蘋廣圻同客郡齋

酒邊臨汝話前遊池館琴樽一霎收却與詞人同失路世間

何事可迴頭

袁壽階廷壽卜築楓溪鑒別文史極朋簪觴詠之勝今亦素筆康山依人憔悴矣

禺筴紛紛供度支上公鞭算費操持分明釣叟收綸日癡絕

羨魚寒鷺鷺

舳艫銜尾大河千尺水無波捩舵難十萬權郎身手好可能

禁得朔風寒

時清舟阻淺

生無竿牘上平津一刺何曾拜路塵終覺豬肝累公府俸錢

分到倦遊人

謂都轉贈金事

江關詞賦愧蘭成枉辱宗工鑒別精未識樊南金鑰集他時

可附會昌行

都轉深於魏晉六朝之文時爲選定拙集

硯田無歲客

囊寒虛費文翁議講壇毛卵鉤鬚成一笑祇園

容易布金難

時寶應將建書院都轉太守議以子主講席旋以經費不足中止

賓鴻雪爪偶相於

一寸歸心逼歲除未免浮屠桑下戀山陰

佳釀羽陵書

### 移寓題襟館示蓮裳芙初二首

敢說移牀契重煩掃徑勞江湖添爪跡情性洽風騷月榭鴉

羣靜霜墀鶴骨高客棕安穩處不定藉醇醪

二等金釭背三冬倦客心天涯蛩駝伴雲外鳳鸞吟此日足

可惜他時懷好音歲闌人事迫行樂莫侵尋

### 讀蓮裳芙初見和之作再答二首卽送其入都

牢落身何拙飛騰景又斜占天謀握粟閱世愴搏沙赤縣生

涯薄黃塵夢境賒消魂二分月不獨弔煙花  
聞有高堂在青山未可安衝風向徐沛攜枕到邯鄲冀北空  
羣易淮南招隱難關心霜月夜珠斗漸闌干

康山二十韻

一簣嚴闥曲三成松磴斜薜痕低滑遶蘿影仰交加翠嶂畱  
雲細紅塵斷市譁層尖亭露角孤聳石排衙豁眼明天鏡遙  
山數髻了野鷗眠極浦晴雁落圓沙別院開珍館閒房拓絳  
紗藏書瑤鈿軸讀畫玉鴉叉紙醉金迷地香濃笑淺花意行  
關詰曲回面碧周遮跌宕追前哲酣嬉會越娃風流賸腰鼓  
恩怨了琵琶宿草才人墓連蕢大第家宅圖江令擅詩誠竹  
翁誇竹垞康山詩有  
有約江春到句

法駕經遊豫

宸章疊寵嘉璿題昭綽楔珠字護煙霞歷歷思饒樂堂堂閱  
歲華賓仍集芝蓋詩或寫薑芽倦客清遊續流光默感賒霜  
鐙涼月夜莫厭泥銀槎

臘八粥

朔風晝號日滿檐浮浮甌香盈笑黔新杭滿甌火半杓芋魁  
大雜菜甲纖閉口輒嚼如餉黏佐七薑豉椒薑鹽刊江敝俗  
饒樂兼肥肉大酒腥羶厭腐儒自笑口腹廉中有至味殊酸  
甜隔牆鄰兒語詰詰傾盂未足嘯索添翁姥謂兒少勿嫌不  
聞吳中官粥嚴飢民萬餘飢火炎朝光黯慘霜飈尖重城魚  
鑰初啓鈴爭先性命忘危阤踐踏肢體爭擠擗有死未得脣  
一沾爾曹飲啄安窮閭夏蟲不識冰稜銛我聆斯語口亦箝  
推案廢箸意不怏呵凍賦詩指排籤持作酣參羣生砭

春初赴廣陵道出吳門酬吳巢松見贈長歌時吳將  
之嶺南 乙丑

昨歲秋風兩無賴我抱沈疴君落解今春昌亭柳慘慘我往  
江北君天南天南江北雙飛翼珍重萍蹤團一夕我甘爛醉  
頽玉山君自高歌拓金戟燭花爛爛繁星明天狼墮地鏗有  
聲西陲已喜殄狐兔東海計日清鯢鯨延陵季子莫歎息洛  
陽年少才崢嶸要須世業嗣韋孟那用詞賦悲蘭成自笑屢  
空無半菽却爲蒼生憂不足酸寒骨相殘殞病偏愛將軍普  
黎曲力孱氣餒志則荒年來漸悔狂夫狂誓祛百念滌腸胃  
行掃萬幻歸文章文章拓落成何濟只盼青山穩家計梧葉  
秋窗一枕閒桃花春雨雙扉閉故鄉老屋補何時乞食長裾  
且須曳扶輪海內曾大夫開閣招泛韓江艫敢言神契在文



字尙鑑嬾性耽菰蒲有日藜羹遂初願小秦淮水抽帆便逝  
拌蘩落學豹隱聽子騰驤占虎變雲飛泥伏總殊轍戴笠乘  
車會相見詞竭扁舟待明發子亦南行向於越只應庾嶺萬  
株梅照到揚州二分月

賓谷都轉招集後圃觀射和史恒齋學博作

瘦日暉暉風淅淅千步球場一星的乍黃柳色繞塍勻初茁  
草頭看電激使君當年扈

上蘭豹尾甘泉恣游歷七萃材官纓羽會四廂大將彤旌錫  
鴻文早見嗣楊馬餘技猶能鳴霹靂竭來雄藩領煮海豈有  
壯懷悲伏櫪蓬矢桑弧禮則然襄尺參連辨尤析縱觀安用  
點揚觶習勤聊同陶運甕不然刻骨愛談藝或以精心喻鳴  
鏑鰕生少經幕北庭合圍飽聽營門笛金埒揮弦都護府平

沙標箭單手壁虎頭食肉縱未能  
釐血行觴手曾擊蹉跎賦  
筆負長楊桂苒孱軀儕散櫟看人引臂落雙隼自笑退飛成  
六鷁怕首韓刀氣已衰笠檐蓑袂情偏渴側聞漁隱畫西溪  
都轉有西溪漁隱圖初願分明戀蓬萊  
逝將異日從釣遊那美天山傳  
羽檄蜚鴻遵渚會有時射鴨桃弓請先覓

### 積雨三首

曉暮檐聲急侵尋酒病深  
釀成無麥歲灰盡問花心得氣游  
鱗隊離羣斷羽音鬱金堂上燕寒意亦難禁  
卑溼淮揚地真占豕涉波未遑愁隴畝先恐合江河薄俗蠶  
桑廢春人醉夢多流民圖畫裏還有雪兒歌  
往歲鄉閭歉今春水潦連戶增新菜色農泣落花天未免身  
家慮翻愁信息傳康衢笑宏願八口尙迍邰

雨不止春將盡矣感書

滴檐聲裏度春宵九十韶光黯黯消已過去時誰愛惜最繁  
華地亦蕭條爐香泛夜溫猶戀鐙影禁寒澹不搖舊夢祇今  
拋未得五陵芳草玉驄驕

古詩贈顧澗蘋

中壘條九流諸子繼六籍子衰別集興藝文志繁蹟詩賦分  
五家宗派傳古昔說亡目猶存原委畧能繹就中馬與揚摛  
辭乃極則相如著凡將詰訓事詮釋子雲本經師油素齋四  
尺寧惟才璘斌要本學宏碩卽如班論都蘭臺擅史職平子  
研京手元象精究測文外各有事往典具可覈源積流斯長  
所吐視所食是以詞章貴足參經訓席自從榦材多鹵莽昧  
持擇冥心矜撻取求易思弋獲目乏寶書寓陋挾兔園冊葩

華稍剽盜丹牖資塗澤吁嗟潢汙水安望當潮汐顧君挺中  
吳神觀秀孤特臣朔誦卅萬淮南讀三壁微言墜義研隱伏  
工發擿實事求是懷咫尺聞掃髮績漆簡汲郡探亡篋河東識  
四部肉貫弗百家心應鏘富真山淵苞纖或蟲魚析本此爲  
文辭貫虹升玉色連牻出瓊製寶氣戶庭塞羅絡東西京揮  
斤潘左格絳雲卷霄青明霞爛城赤曄疑小儒眼褫攝才士  
魄曠世茲雄奇畢嵒峙巔方今儒多途華實異畛域樸學  
令染翰方心手生棘浮夸與論古低首但塞默易觀兩相笑  
楚失齊豈得庸知振奇人不假鴻溝畫大師鄒魯儒壯采文  
章伯恢恢奄有之三才屬逢掖蒼茫萬人海求對無前敵何  
怪詆訶多羣流被彈擊我慙膚受學廿載攻篆刻亦思本原  
求苦爲貧病迫力愁十舍退道尙兩塵隔傾折到一人糾繩

望三益鸞鳳不偶世千鎔善自惜終當入承明或者賁蒲帛  
煌煌第嘉頌詩書足羽翼否亦奏陵雲異代興歎息千秋定  
文字流別重判白著錄七略間君其庶靡忒

和作

元和

顧廣圻

淵贊

洙泗列四科游夏爲文學遙遙二千載屢絕仍屢續近葉  
生亭林天使先知覺疾呼扶微言痛心憫末俗吾道期起  
廢斯人免沈陸嗟予逾壯齒遺書始得讀雲霧祛障翳歧  
旁止蹢躅未能有一體敢遽稱私淑庶幾綿葛力密沒激  
揚勳乃今多鬼瑣視昔尤歎曲服鄭被擗摺班荀遭割剝  
六書與九數貴耳而賤目不落則著作有集成欲速載道  
化異物言志競流毒春華秋實間涵涵合一族幾乎古典  
型破壞不可復何爲使之然厥疾膏肓篤奴主互紛貶歸

致特利祿懸金瞰國門抵掌鑽華屋假道資巧取筆硯以  
銜價習非旣勝是詭詭拒忠告投石竟斂手拯溺枉濡足  
客歲交彭君耕野獲結綠潛心閱雙鬢文選理精熟博瞻  
涉墳素武庫便便腹卓犖吐詞賦羣言受約束壯采麗如春  
虛懷謙若谷時時勞諏詢一一累往覆奚殊太原人大雅  
接所獨竭來貺長篇光燄絳霄燭抨彈到汝曹連拄折其  
角披覽意乍快數四色轉蹇昨聞論撰述絕重曰知錄於  
中具鈐鍵爲此樹正鵠器識士所先下者咸赳起生材必  
有用區別譬草木六經待鼓吹胡然薄雕琢盍奮間氣雄  
便振積衰局敷條發詩葩立榦堅書樸重令文洎儒衆輻  
輳其轂登高據壇宇風移杖陶育泥塗跡偶屈亦日星河  
嶽徵信仁人言貽孫君子穀千秋值夔野聆音辨清濁彼

言角會言金夕  
三  
哉當世名彌榮或彌辱倚張拔幟軍我願執鞭僕雲龍相  
上下驅使堪追逐作頌幸永懷取義清風穆

題澗鑿焦山拓鼎圖卽送其之山左

顧文學將往齊魯屬作拓鼎焦山詩焦山我遊已十稔鼎亦  
手自摩挲之雲雷形繞耳與足九十三字形摹奇鑿旂縞韞  
錫世惠用享列祖同尊彝匱何滅召公虎祇少吉甫旬宣  
詞繫予區瞽昧孳乳以手畫肚空嗟咨迴頭卻顧海濤涌難  
忘金景歆雲時文學今之呂與叔精博遠過黃伯思讐書餘  
力校金石枯木堂下煩旃椎推詳跟肘求証佐如劉沓辨犧  
尊犧鑿奇嗜古世無匹所笑不救南山飢韓江小住去勿勿  
待泛汶濟遊臨淄泗鼎雖淪嶧山火應騰玉檢明堂基搜牢  
或復歌得寶兼借東閣商奇疑

謂孫淵如觀察星衍

頗聞讀書憂患始

何況文字爭豪釐願君勿更學古訓發秘神鬼防相欺一丁  
不識乃真樂光顏阿耆夫何辭焦巖已登倘登岱但訪沒字  
秦時碑

簞山草堂圖詩爲華亭何氏作

單椒秀瀛壖綠篠媚厓广修眉九峰浮幽築一壑儼俯澡澱  
泖澂仰熙松杉颭人同酈谷壽俗嫺邠風儉種杏平泉芳斲  
苓煙鉏刻靈蘭寶書讀蘿月閒門掩風蘇悌塵蹤霞標遡深  
嶢瞻言瑤華寄奄忽山情忝葺宇期後時披榛訪求點

劉松嵐觀察大觀見示詩藁率題其後

獨餐海岳秀不尙悅聲辭冷抱有孤寄熱官無此詩釭花宵  
燼後諫果味回時欲結參寥契心香問導師

題襟館分和杜工部四詠



病柏

亭亭奇樹英峻岳託嘉種文章不自露世眼已矜寵猗彼搆  
厦姿需時備梁棋誰憐冰霜侵勁質亦爲動黯收濃陰翠潛  
損天骨聳飢風有同悲撲簸落毛氄分乏陵霄心能無烈風  
恐轉羨櫟社材天年全擁腫微茫造化權榮悴邱山重神明  
倘扶持再拜意彌悚

病橘

橘實充土貢淮海州惟揚積雨敗禾麥素榮亦凋傷秋風雖  
未至生意先積唐芽蘖冒蟲蠹如苗長蝻蝗書生悲楚頌綠  
葉萎以黃野老坐嘆息恐非有年祥南中歲頻歉比戶鮮葢  
藏果實亦細事豈復關凶穰縱饒千奴婢何裨萬倉箱寄謝  
山中人勿慮園稅荒

枯櫟

蘭膏自煎熱戕美傳昔諺物性雖蕃滋恣求力亦倦櫟櫚本  
利用工器掃摺便轉以取資多翻覺物生賤庸知頻年來無  
復舊蔥蒨膠同脂膏盡悴嘆顏色變剩葉亦摧藏蕭蕭怯風  
戰空思曩時盛一碧濃覆院楚地扶藜翁行庭發遙眷誰持  
休息心保持歲華晏

枯枿

倚江有美植佳氣鍾扶輿直蓋摩穹霄餘陰覆遽廬文彩耀  
杞梓奇香襲衿裾惡木徒自蔓顧影慙薪樗風雨不擇地良  
材亦歛歔摧積楨榦器貌悴神鬱紆尙展幹排力雷電交紛  
拏我聞因篤理培覆持太虛猗颯縱動地勁節無乘除終當  
保芬芳豈慮填泥淤長庇杜陵老樹根安讀書

廢畦

勞生無分享蔬盤老圃荒蕪逼暮寒歲歉場師亦牢落家貧  
僮約久闌珊一籬暝雨瓜棚拆十稜秋煙菜甲殘莫問蘭成  
小園事江關詞賦最辛酸

斷橋

津梁行旅重徘徊雁齒紅闌一帶摧半缺臥雲沙坼坼雙虹  
收影水容開雪灘有鷺衝煙渡霜磴無人躡屐來且制窮途  
阮生淚枯槎還具濟川才

寒雀

壓幕重陰黯不收蹋枝寒雀訴啁啾誰知占得雕梁者斷雨  
零風一樣愁

自警

菱茨磨難就參商勢易乖儒珍須瓦合奇璞要光埋此口惟  
宜飲卿言亦自佳模稜真善術大隱學詠俳

題蓮裳青芝山館圖五首卽次其自題韻

羈心生矣圖勞亭卜安宅一區緣尙慳豈復容選擇如瞻方  
壺山了了暈金碧欲至輒引還失笑皆海客

三吳渺天末一嶺懸座旁楞伽及茶磨左右煙巒蒼昔夢記  
歷歷歲華感堂堂暫遊或尙得我願先汝償

曾聞英巨山上有仙人居岩隱此其最舍近乃遠圖思拋樂  
公祠待著笠澤書故山有猿鶴相憶當何如

蓮裳家江右臨川青芝則吳下

靈巖旁  
小山也

飄風鳥依人急景蛇赴壑雖無竿牘懷俯仰足慙忤猶然侈  
文字相和學鳴鶴曷不并置之名山亦奚樂

醯鷄舞甕天文犧入太廟斯苦早欲逃彼我匪殊調聯牆祝  
他年矢語世莫笑視此一江水相期兩心照

寒竹詞

籬角幽修土花紫石甃灑霜清齒齒捎風翠尾搖叢鈴湘娥  
淚落連珠子朝雲館中春夢醒白沙邨頭雪霰零錦綳罷坼  
冷香在三月柳條無此青蘿影涵空獨延佇碧紗如煙黯無  
語南園胡蝶飛不來瘦鳳飢凰奈何許

冬閨曲

銀箭無聲虬水咽篆縷欲燒心字滅綠燵如熏燭曉紅那得  
初陽生眼纈八蠶繭綿炷不溫鉤頭低軀盤盤雪如簣冷思  
倚誰暖佇苦停辛祗爲君鄰娃笑過雙金井勸製春旛候春  
景翦刀撲落立冰除片月玉梅花外冷

頻伽來邗上過子寓齋酒間賦贈五首卽題其靈芬館圖

故人三年別相憶無一詩殘冬千里至相見無一詞同作風  
中蓬況味不問知但訝鬚髩改神觀鄰衰遲自昔卅角年各  
負倣詭姿身手鬪雞客爪背黃鷄兒忽忽塵土中奔走寒與  
飢初心勉撐拄漸冉瀕孤危冀馬賸疲骨越禽無穩枝嗟哉  
積瘁士元髮能幾時

邗江客終年弊俗無一當慕羶蟻連羣炙手竈爭煬蜉蝣衣  
裳侈翾羽宛邛蕩惛然墮雲霧猥佻託元曠孤蹤違羣趨塊  
影或翹謗稍喜素交來清論相下上藉汝冰雪襟爲洗俗塵  
障所愁坐飢驅世路隘而妨低心逐稠衆奇氣摧不壯玉山  
飲輒殫瑣旅苦誰諒惟有昏鐙搖在旁或知狀

寸管闔前哲新編出行窩雕鏤大集成入手三摩抄想當積  
累初蜚精掃羣魔貧女織縑素寒宵幾拋梭遂成不朽業金  
石相鳴和萬事在人後此事乃獨多盛名與厚實獲一遑論  
佗賤子亦羈窮歲華感蹉跎文章供覆醬家計虛牽蘿一得  
子且慰兩失吾如何

樂生

蓮裳

去鄉遠眉展意不伸劉生

初苦

詬逋謬臺走踈踈陸

生

繼生

廉吏後咳養愁昏晨金生

學山

稍通悅亦復悲勞薪

並舍二三子薄酒六七巡星萍合窮士顏面皆風塵強勉雜

諧笑跌宕終酸辛昨聞清口決小邑遭沈淪行水偶不臧呼

天泣置臣緡錢有常數萬衆勞拊循在位且岌岌何況澤畔

氓澤氓且難活何況蘆中人

出門飽仍愁入門飢亦好與射忘歸矢曷種當歸草我家及

子家帶水非遠道頗聞高齋開嘉蔭足梨棗紉芳九畹滋守  
素一經抱行沽有弱弟轢釜無邛嫂何日宏願償相將結鄰  
老處賤不學恭軒冕等與阜但飲勿讀騷泯泯忘寒燠居應  
漁父卜筮先詹尹造竊冀賜佳占靈氛請同禱

題頻伽病起懷人卅子二首

短李迂辛伴散時風情元九鬢先絲如何燭影幢幢夜不寄  
江州七字詩

江上歸心在雁前相將飽飯祝殘年草堂人日梅花好遲爾  
成都十樣箋

爲人題水南邨舍圖二首

菰葉侵階水浸苔香茅團處蓼花開露涼鷗夢膏騰裏聽過  
彎彎月子來



鷺溪一幅寫鱸鄉橐筆江關鬢著霜看盡別家池館好蓮花  
莊子耦耕堂

寒雁篇

清寒第一集

洞庭脫木葉隴首飛寒雲翩翩來賓雁後侶復前羣前羣後  
侶紛如許略比騫人抱騫緒如掌煙皋掠暝時捎蘆雪岼凝  
愁處弱羽驚弦噩夢闌舊巢猶記雁門山天涯風色平欺易  
人世機心預測難朔管羌笳相間作斜月疎星朶樓角但訝  
冰霜歲歲經不知毛羽紛紛落無分傳書集上林斷腸遙和  
女郎碁全消鵲舉鴻騫志一樣鸞漂鳳泊心江湖隨分尋梁  
稻文章莫騁書空巧排來筆柱不成行印到沙痕僅畱爪滿  
目山川風景殊同聲愁伴尙相呼噪殘廷尉門前雀啼煞延  
秋屋上烏有客深宵酒初醒琴絲不寫朱弦定潑水衾棲攪

夢迴衝煙舫燭推篷聽君不見凌蹙金隄一道開曉音中澤  
更堪哀憑渠訴盡關山怨莫向河干照影來

仇十洲崆峒訪道圖

消寒第二集

夔牛鼓震茄豐誅釜山已合天下符謂朋前馬方明與師兵  
營衛嚴周陸鳥蛇龍虎熊羆旣臨鼎湖飛流珠復馳襄城  
問迷塗巡方封禪古例無公孫肇始有是夫崆峒上戴璇星  
樞廣成仙人泰壹徒特訪至道求元謨窮冥昏默胎性祛慎  
內閉外神明俱勞形搖精惟汝虞守一養和堅汝軀長生有  
方豈怪迂上皇下王道弗渝黃庭內景相灌輸會無上旨非  
圖書聖壽三百康且愉安用岐雷鬼臾區紛紛秦漢勞步趨  
譬著棘衣纏臭帟金丹大藥說矯誣婢顏清臚態萬殊狙則  
狐鳥窟螻蛄蒸砂作飯空勤劬當時繪事無封膜惜不寫此

張丹除用懲覆舟凜衣袂越四千禩來吳歛寶相壽邱工範  
模身丁武廟世廟初南內西內高渠渠騰禧殿頭俠侍姝鈴  
山堂上青詞諛畫師無分陳都吁得毋盡諫竭下愚或勸攝  
生裁細娛或戒誕安排元虛願姬無逸幽風圖不然天姥下  
教色姁媮洞庭張樂羅笙竽饒樂廣麗孰得如曷弗粉本窮  
描摹竭來歲月又電徂丹青未落神彩都不須夢遊狀華胥  
不須大驪撫仙儒鑄鏡亦勿煩軒爐千秋金鑑斯圖乎嗚呼  
千秋金鑑斯圖乎

淮海神弦曲

消寒第三集

普黎傳芭勅勒舞縹醪酌神聽神語昔窺江兮躡江滸今揚  
靈兮福茲土鼙鼓不鳴鳴社鼓魚龍爵馬如軍聲城狐嘯風  
猶厭兵願牛常畔井無燕散水神鴉水如練

右佛狸祠

靈旗開白雁來靈泣雨冬青樹生不磨恩澤封歿而祀馮夷  
宮吹龍笛擊鼉鼓神魚飛空瘦蛟舞六百年間大河主願魚  
勿飛蛟勿舞萬斛龍驤達天庾

右金龍大王廟

夜坐題襟館

竹蘿如夢不成陰六曲闌干一客吟枯樹暝猶容雀噪畫樓  
高獨受霜侵碧天了了前身想圓月依依後夜心莫更霓裳  
閒譜曲聽風聽水總危音

里居雜述四首

丙寅

莫作空中雲行止風使之孤蹤一振蕩黯抱無依悲莫作諸  
侯客去住難自持他人盛衰事爲已憂喜資往者苦越鄉願

守衡門飢及乎歸衡門此心仍四馳孤雲靡定態孤客靡寧  
思嗚呼無根物自全那可期

風尙恥竿牘百刺無一投嚮勞張獲澤

餘古

招泛邗江舟大雅

曾南城

賓

仰鏡集萬流語無醜蔑善識等北海求欵我東閣

筵館我三層樓伊侯繼典郡

墨卿

琴酌相賡酬是皆賢大夫

煙月輝春秋俯仰尙增忤刺促遊子愁明知勝會難忽散風

中漚紛紛謝宣明杳杳韓荊州安能抗塵俗更謁東諸侯

弱弟姿驚蹇年已十六七或書或學賈兩者術無一瘦妻拙

操作門第空尹姑衣食尙不完遑希佩與黻嗷嗷八口家收

并乏芋栗坐槁理或無生存事難必昌昌春風中長養到荒

第宿麥暖漸抽寸草亦復茁豈其彼蒼心人乃不如物

生無千古憂乃憂昏與晨生無澤物力乃望人施仁自歎亦

自鄙旣笑還復顰  
人度一歲岌岌如罹屯  
一歲懂得免來日  
仍遼遼百年三萬場  
何者眉頭伸學道苦不堅  
信天聊葆真  
典衣謀斗粟一笑慰家人  
倘緣九食例尙可支三旬

寄賓谷都轉二首

迴首平津館  
琴絲悵不和  
殘棋餘冷局  
逝水少回波  
芳榭凝塵在  
遨牀勝事過  
春江風一笛  
愁聽感恩多  
問訊淮南况  
宦情應更闌  
矜持到文字  
籌策及凋殘  
千古爭名易  
羣心副望難  
百憂叢寸抱  
人作好官看

寄蓮裳并示郭蘭池

瑞王子鸞

崇熙

向來多病酒  
禁持傷別傷  
春又一時如夢  
歡場原變幻  
舊巢飛羽各  
差池  
煙花漫作新年態  
風雨應增獨客悲  
揔有朱絲琴一曲  
斷徽零柱亦孤危

示四甥式如三首

兒駒解騰驤其氣無駿駁童牙校文藝志欲吞老宿吾甥方  
四齡卅角歸母族媿媿諸親戚誇汝好眉目辛苦十年來森  
然見立玉讀書卽未富經傳略能熟文章總初成居然有邊  
幅昨應童子科落筆官長服所當雖小敵氣壯先奪槩應知  
奏長楊異日定能速浮榮非所期書種已可卜何必如陽元  
笑盡酒一斛

衰門百無希屬望到嫺黨此情良可悲此事或能仗汝家高  
曾來奕葉清芬仰汝祖司祥刑哀矜邁寒朗汝父窮益堅篤  
學守誠讜汝母頗賢明境約心則廣天其昌汝身骨相早偶  
儻汝姨老無子聞之喜兼快汝始最欣然記汝在文繮致身  
葆初基育德慎蒙養阿九羨兄不耽書速成長

文章本雕蟲應舉尤末技我年三五時塗抹亦自喜龍鍾竟  
無成既悔且深恥拋殘兔園冊零落條鈔紙多恐溝壑填詎  
望溟池徒僅存一尺集棄亦同敝屣頗冀汝成名或肯相料  
理升沈不足言勗哉作佳士賢豪父執存一一堪仰止學或  
揚馬倫品或圭璋擬取資良多途去非從其是汝舅乃下材  
他年慎毋似

春陰

襲衣花霧罨虛堂只擬曹騰付醉鄉遙指珍珠簾十二最高  
樓上最淒涼

雨中

雨雨風風近畫闌分明鄰女怨新寒牡丹鞋子明金繡不踏  
春陽枉自看



里中桃花盛開閒居無日不出遊遊必醉醉中賦此  
隨風步履春茫茫十里五里吹生香城苑屋少足曠土恣令  
眩轉千花光搖珠夜色洗曉露塗妝絕豔明朝陽東皇毋乃  
尙絺繡爛若文境開齊梁小村數家枕流水古廟一角當垂  
楊梨雲低迷間淺白菜隴高下酣嬌黃煙皋林深曲徑窄輕  
紈扇小單衫涼傭夫販婦亦欣賞何況窈窕諸姬姜窮居生  
計百無著泥洹覺路真吾鄉多生綺習磨未盡尙與士女爭  
丰昌泥飲相將拉田父醉倒不須呼葛疆衝愁便是不死法  
世豈真有求仙方困眠平疇芳草側酒醒落月橫參旁殘紅  
萬樹寂無覩一碧了了天何長

舟次卽目時復之邗上

細雨平江上閒眠淺醉中汀花有開落溝水忽西東生事悲

華髮春愁積短篷關心路旁柳眠起總隨風

阮芸臺中丞元得前明楊忠愍公遺墨四幅潢治成

卷付焦山僧巨超世守徵詩紀事敬賦長句凡詩三

所苦雨寄繼津一哀商中丞一元旦有感寄鳳洲文

一首為開煤山記札一通亦寄繼津者繼津都御史

王遜也皆公謫尉時書向為謝東璽侍郎

三詩一記書一紙謫尉遺牋藏謝氏侍講弄一還其四中丞

得之付山寺椒山無意合焦山墨緣兆寄荆川言丹心浩氣

凜千古拜公書如見公怒字中有棱不敢捫傳僧勝於傳子

孫百萬魚龍都屏息海水天風護殘墨握拳透爪顏魯公鼎

銘鶴銘皆下風壺盧詩刻虎坊畔忠愍堂盧上刻云釀成四

五字乾隆初有人購得于京師虎坊橋江北江南兩虹貫同

懸日月何物如趙公如意閣部書鈴山青詞卷盈尺丞相權

尊留不得

真州城西汪氏榮園廢址有美人石芸臺中丞訪之  
易名湘靈峰屬賦三絕句

蘿風荔雨護雲鬟過眼滄桑一霎間那有心情鬪眉嫵隔江  
無限夕陽山

瘦影亭亭倚斷垣平泉何處問荒原金仙鉛水蟾蜍淚一種  
傷心兩不言

何須新婦髻戔戔莫把苔痕認翠螺只合曉風殘月下當他  
銅狄一摩挲

賓谷都轉座中晤熊夢庵員外

方受

以予嬾癖性成

不規而譽兼贈以詩走筆奉報

瘦權嬾可詩難學士梗桃人愁不禁散髻數來華士笑杯湖

今見漫郎心小眠我早盟煙水大隱君應倒佩簪雲外雲中  
雙倦羽不妨蹤跡判飛沈

七夕和都轉

牛女星臨地江淮水警年渡難憑鵲羽窮欲貫天錢箱輓銀  
河畔機絲夜月邊尋常耕織事也覺讓神仙

抱琴圖

情情瑤怨託湘皋綠綺無聲碧月高輸與西池仙一輩成金  
浮磬子登璫

七月十一日湯雨生騎尉

貽汾

招集蕃釐觀寓齋分

得鸞字

壯懷如盛暑時過漸闌珊新知如清風入座襟抱寬琳宇蕭  
花藥秋人羅敦槃紛紛湖海客落落驃騎官馬塋謝豪氣樽

疊築騷壇塵揮玉屑罪樂奏朱弦彈華鬘少年場羶葦戀羅  
紉誰能煙花地泊然敦古歡酒酣話家乘鯨海翻濤瀾君祖  
山殉林爽巡遠血凝碧肝眵節並完君父同悲吟國殤篇老  
文之難淚餘辛酸君生忠孝門樹立匪所難勿謂偏將卑有力無由  
殫勿謂太平世不尙彭與韓我聞白將軍雲遺澤畱江干刀  
犢銷亂萌萑苻息兵端一軍裘帶靜萬戶耕桑安至今民尸  
祝召杜無殊觀康濟貴隨分不必皆儒冠揆奮無兩途胡爲  
薄糾桓曷哉紹前喆榮問垂不刊區區文藝事我方悔雕鑽  
君何尙溺苦麗藻鏘心肝盍請姑置之各勉凌風翰君其宏  
遠謨我將遊汗漫深杯舉相屬莫惜秋宵殘出處縱睽迹此  
心解扶搏雲龍會追逐不羨驂虬鸞

夜坐

霜鴻聽徧羽譙譙  
鐙影樽前嬾不挑  
風雨簷花都錯落  
江湖魂夢亦漂搖  
何年黃鵠陂能復  
豈有紅羊劫未消  
欲問故山漁釣侶  
可容瓢笠穩團焦

小謨觴館詩集卷八

詩餘附錄

鎮洋 彭兆蓀 湘涵

填詞至近日幾於家祝姜張戶戶朱厲子方心沓舌無  
志與諸子爭長而瀏覽所及頗不欲囿於時論少作壯  
悔久付臭蟬掇拾之餘僅得十一強顏存之所謂遂非  
文過也甘亭居士識

賣花聲

雁門道中

石氣冷斜暉關路依稀西風尖似弩牙機吹過紫厓松一片  
卷出紅旗何處好巖扉門掩薔薇雁門山上雁初飛十五  
小叢歌略略緩了征衣

臺城路

柳條邊口桃花徑修廊架來厓广鞦韆屏開兜渠爐炷催把



八分羹點驚鴻冉冉看襪印香痕蒼苔路輒一握飛雲春波  
橫上酒邊臉神雞放教枕倚儘偎鐙鬪腕坐月嘗芡半角  
青山週遭翠箔不許塞風偷颭紅蕤宵掩只預怕來朝送人  
眉歛六曲瓊疏日光釵焰閃

清平樂

調鳳兒

紅樓一角髻影當風弱月底吹簫曾有約紙尾親書署諾  
丹山身宿兒家將雛好夢真耶消受綠么風味今生修到桐  
花

浪淘沙

屈戌兩鉤纖繡戶深嚴薰籠小響夜厭厭似說浣紗歸略晚  
溼了鞦尖何處望雕奩數盡銅籤耐他風露立重檐今夜  
二更明月上萬一鈎簾

鳳凰臺上憶吹簫

朔州沈別駕席上出家伎侑酒

鷄塞風停羊燈光豔卸鞦人坐蘭叢恰舞娟小隊笑靨春融  
排就箏牀盃曲流雲聚點點眉峰釵梁顫山香一按飄下殘  
紅冬冬此番見也記前度窺人曾在牆東看霜濃馬滑索  
要畱儂生怕無情樂句催短拍九月庭空春魂裊隨他佩聲  
穿過屏風

虞美人

雪花簾護桃花影寒悄珠櫳靜一年幾度粉牆西生累阿儂  
口業到泥犁豐貂壓鬢驚鴻杳朱鳥窗關了暫時分隔好  
商量等得鞦韆時節再形相

行香子

鬢

盤後鴉濃掠後雲鬆壓邊沙烏帕斜籠纖髻何處領略從容

向揭簾時兜鞵裏溜釵中 不着游蜂不放飛蓬貼珠璫越  
撿玲瓏行雲歸後明月堂東有一層香一層霧一層風

百字令

春燕一道引鞭絲送到枇杷花底紉幔沈沈寒不捲時被悄  
風吹起碧玉梳奩泥金簫譜卍字沈檀几都梁薰處房櫳清  
似秋水 試問小市長陵誰家姊妹擅新聲北里頗解國風  
哀怨事生愛鳳窠門閉小話蘭因微聞蕙歎弱絮東風裏夕  
陽如此傷心杜牧歸矣

高陽臺

悼秀英

絡秀聲名雲英標格六時看慣翩翩話葬搗箏碧紗傍晚如  
煙粉痕彈落餘香膩領徐孃情味中年最相憐月底銖衣風  
約雙肩 驚心紫玉成煙去賸白花飛蝶青草埋阡笙鶴蓬

山知他何處因緣花梢小小梳頭屋掩春風永斷珊瑚鞭識淒然小極前頭一曲遊仙

如夢令

一霎金箏調柱一霎銀釭低語如夢忒怱怱也把盟香說與無緒無緒落月馬蹏郎去

鵲橋仙

鐙長鳳脰人長錦瑟敵住玉關風力柔鄉酒國夢溫磨聽縹緲穿簾一笛霜華漸灤角聲低咽斜月出門時節高樓已在數峰西又何況樓頭消息

金縷曲

大同道中

煙冪冪山樹馬郎當西風茸帽桑乾呼渡一隊飛狐峰上雁倒把玉鞭遙數問何處李陵臺路半統殘碑敲石火剔蒼苔

難辨朱邪墓今古事草頭露年年腸斷西征賦話叢殘漢  
家飛將唐家都護最有蕭家妝閣好俊煞阜羅花吐也只賸  
香詞魚蠹急唱伊涼偎阿輓借鯤弦鐵撥憑他訴填臆恨且  
分付

滿江紅

寄湘蘅女弟

搔首箋天悔不作織兒驂女圖半世居安夢穩釵荆裙苧訴  
憤中心綦子局量愁一掬梨花雨試看他侍婢賣珠迴寒如  
許彩鸞筆書韻語雲錦段停機杼喜咒桃猶有劉綱仙侶  
翠袖誰同空谷倚碧雲分付蘭香佇祝他年飽飯武陵源胡  
麻黃

又

客中寄張子白八首

拓戟悲吟問海內金蘭幾譜擗白眼罵人劉四笑人鄭五六

合詞華憐疥駱三都才筆真傖父論英雄誰識叩壺人桓宣  
武 茸城客詞壇虎狂態作新詩賭似大兒文舉小兒德祖  
酒國掀翻歡伯壘春場亂打蠻奴鼓笑一雙風漢兩花顛甘  
陵部

月地花天狂做盡青鞵幾兩數不了酒前彩筆春前蘭漿雄  
劍一雙牛斗閃大刀八尺縱橫盪儘少年才氣壓三河關西  
將 團沙跡心空快蒿莪恨頭應搶又綠楊杜宇催子掉鞅  
灑血扶將狸首木遊山拋卻龍鬚杖感挽歌和淚送歸驂哀  
音響

素鞵東歸渾不飽庾郎蔥薤漢家似西風黃葉霎時吹敗奴  
婢更無千匹絹機雲難保三間解但一樽臨去酌庭花卿休  
怪 焦先屋拋菅蒯博士券書銀蠶笑立錐尙賸大千塵界

雁稅魚租償盡了飄蓬再理江湖債檢細囊滿束馬卿文從頭賣

秋冷花殷打包去黃皮絳縛看多少魚龍起蟄騰霄鵬鶚白月團團貽笑句鶴聲一一偷人作恰泥金帖子亂飛來從天落北平將無侯爵子雲字終投閣奈膏騰常醉張家白雀腐鼠任誇滋味好鵲鵲不受林鴟謔問故人招隱有書不予應諾

放溷秋濤嘆索米王門纔踏早滿目哀螢蔓草荒隄古塔黃歇浦深波穀遠呂蒙城塌檣風颯笑覓枝烏也學行人飛三匝休輕掃平津閣且只下陳蕃榻把名心鏟卻但嘗蚬蛤枚叔里從淮海訪阮孚屐向金焦蠟儘新詩高唱和天風聲鏗鞳

顛倒黃興誰辨別神磨跛馬儘聽慣陳隋蟬噪雷鳴釜瓦面  
壁未成龍象果談經空建鶩摩社縱登壇豎拂有誰聽喉先  
啞鷄缸酒斟盈竿牛腰束詩盈把算知音誰似安昌侯者  
意氣殊羞絳灌伍淚痕且學姮娥寡只數行佳傳倘需君他  
年也

客裏梁鴻曾語我孟光有婦鎮病髻東風時擁藥爐煙瘦常  
把爛銀盤掩却防他奔月姮娥走果書來報落女嬃星天風  
驟且莫嘆王生白也莫鼓莊生缶想空花開落幾曾長久  
只悔十年容易別勞渠半世空牀守問歸來蛛網冒流黃傷  
心否

僕本癡人干甚事淚花撲簌平歷徧中年悲樂哀絲苦竹最  
薄斷推才子命難消第一團樂福怪年來騎省鬢星星何其



速 蓼莪什我廢讀渴鳳句君應續算兩番人事一般振觸  
開閣遲君拏艇至埋愁其把糟邱築放悲歌和爾七哀詩同  
聲哭

蝶戀花 漁舟圖

浪絮浮萍湖海氣羨煞漁夫守定蘆花裏妾自織蓑郎鼓棹  
鯉魚風弄春裙細 鏡面荷花三十里茜色單衫藕色雙彎  
臂棹入南湖眉月起迢迢天半餘霞麗

送入我門來

寓館通壁

錦鏤文槐花攢曲榭瓊窗一片晶鹽聚香迎旭不怕峭風尖  
銀鈎了鳥層層密更紫棧銅鳧縷縷織 說起天涯遊子也  
有三間草舍紙閣蘆簾賣珠閨裏新把屋茅添一枝紅萼無  
人主想碧玉抽條又過檐

七娘子 雨

敲窗銀竹泠泠碎惱離情二等金釭背碧  
螭聲淒紅蕉韻脆天公那許如鉛淚  
枕頭放處真無謂甚冰蠶織就今宵被  
剔了鐙醒照來花醉無言且掩重門睡

蝶戀花

花朝三首

姹紫嫣紅開滿砌長晝愔愔春到消魂未  
天早安排將息計七分陰只三分霽  
花似珠娘初墮地酥雨如絲洗出蘭湯  
膩院是靡蕪牆牡蠣東風一翦千金意

人與尋香蜂一隊八寶闌邊做個金錢會  
天賦芳根紈質脆護持先要花鈴備  
十五吳姬初約翠骨彩梢頭也當穿犀  
佩一一替他排行輩李娘阿姊桃根妹

種玉居然煩富媼誰記庚寅誰把高禱禱  
我欲書成閭史橐

小名合向蓉城考  
杏嫁梅娠看尙早  
試問東君持底催妝  
好十萬榆錢齊撒了一天紅雨鶯曉曉

賣花聲

半開花蕊

芳意坼微馨  
春色星星塗妝綰  
髻小娉婷  
政好年華剛豆蔻  
十四三零  
紅玉易飄萍  
莫放杯停待他開到越梅青  
總有櫻桃能結子  
不算韶齡

臺城路

賣餠天氣游絲颺  
春風又撩人面  
阜茨橋頭寶釵樓上多少  
鈿箏歌扇花憐柳眷慣  
金叵羅深玉檀槽  
軟燕乳鶯雛舊情  
提起也應倦  
天涯黯黯  
緒守半弓齋屋長是孤掩  
絡角車兒平頭鞦子  
何處茜裙歸緩  
簾波句線只可惜消魂  
梨花庭院負了  
窺人紅襟飛一翦

浣溪紗 月

不要雲衣護淺深  
晶簾了了夜沈沈  
露華涼到薄羅襟  
玉  
字瓊樓千古淚  
青天碧海兩人心  
商量爭抵一春陰

水龍吟

花冠喔喔三聲曉  
風吹到梅花帳  
鐘兒纔罷  
獨兒未醒沈沈  
交網象篴犀梳  
年時猶記靈虵妝  
樣倩晶盤低晃  
圓冰雙映  
看朶朶鬢雲漾  
剗地征鴻情狀  
問犀帷春人無恙  
天涯夢  
穩也應驚斷  
轆轤聲響  
總有朝霞料難照見  
眉間腮上  
得知他一片晨紅  
射到幾樺窗亮

紅娘子

春暮

陰薄榆錢仄絮重  
游絲織錦段  
般春桃波般去  
鶯梭般擲漸  
東牆拆盡畫鞦韆  
也無人知得  
密約憐樊懃  
錦字沈烏鰲

言角會附錄  
澹墨輕衫楊花小扇層城消息鎮傷春夢雨一年年了清明  
寒食

洞仙歌 七夕四首

昏鐘動早漸魚雲卸蛤月纖纖一眉射記簸錢綺侶蠟鳳  
雛齡陳瓜果共拜雲輶星駕前塵風電掃鰈散鰈分冷落  
秋娘好亭榭隨分且銜杯旅伴天涯只一桁翠桐花架縱巧  
繁靈蛛網條條須繪不分明情絲今夜

星雛靈匹想九霞光底卻扇天孫定遙企笑踈籬錦石朶朶  
牽牛搖風蔓也解向人流喜銀灣橋度了霧幌雲幃隔歲  
離愁細提起只恐感霜娥碧海青天長孤守爛銀盤裏果風  
月人天一般情應歷歷星榆盡成道理  
癡兒丐巧奈靈機易得第一難求點金訣看拋殘鸞杼十萬

猶賒持籌算爭得天錢無缺  
斜河低絡角溝水東西眨眼  
悲歡判環玦蚪箭忒分明  
滴滴蓮花渾促就雲車風  
警問何物金錢恁無情儘  
天上人間坐他離別

爛斑珠斗漸秋庭影寂獨  
指參旗望鄉國任簾紋皺  
水簾縠濾雲誰消受一枕  
素馨花側明星杯易醉索  
笑無人穀板花瓜等閑設  
憔悴損紅顏玉露金風負  
幾許紗明幃碧恰政好  
新涼未寒時趁落月千山  
夢歸還值

浪淘沙

雁

天色越窳開身落雲階擔  
霜閃月一繩來逼近星辰  
書蠆脚也有些才孤客白  
楊齋没人安排半窗風弄  
小松釵讀了離騷溫了七  
交過秋懷

臨江仙

蟋蟀

一點秋心誰領略除儂便要推他涼宵絮盡雨如麻葳莎浴  
砌草躑躅半牆花還有飛奴兼嬾婦霜天一例牙牙流螢  
福分較爭些不知風露怨只傍畫蟬紗

祝英臺近

響犀梳聽鳳奏春影玉臺展小小璿宮恰對綠筠館要知有  
限紅牆無多碧落只幾扇絳紗遮斷許相見爭奈玉暖酥  
凝花鈴夜深綰點屐更衣望斷隔窗眼禁他甲帳鈎聲丁簾  
燭影儘紅豆一庭栽滿

風蝶令

月夜

鮫褥招涼浸犀簾鑄玉懸金釵料得曲闌邊畫了幾痕花影  
暗淒然破盡團圓夢歌殘相府蓮一年一十二回圓畢竟  
姮娥有福住情天

瑤花齋前桂花盛開作

青雲翦葉粟玉黏枝訝秋浮如許紺幃豹脚飛不定人在越  
沈堆住星高月午早溼了一庭珠露逗桃笙簾底微馨鶴唳  
水香簾戶八公舊有盟言歎鴻寶書成欲寄誰與芙蓉金  
鏡夢不到七寶圓輪深處小山好在算風幔攤書也苦但丁  
寧有日歸來檢點椒漿遺譜

綺羅香

齋中聞前廳演劇似是玉簪記中茶叙一齣漫賦

霞帔金絲花冠玉葉人在墉城天咫選得春場略與武林相  
似盼得到蛸蛸天邊先坐向藕絲雲底逗蘭風軟語如弦冷  
冷勝譜女冠子 弄香人影何許爲問魚家姊妹可曾有此  
小洞雲根目斷蕊珠宮裏渾不見洛下元淳又何況季蘭仙  
李攝春魂一曲翻香璣囊尋鳳紙

陳妙常南宋時人詞見名媛璣囊中



長亭怨慢

賞菊卽席

漸碧落一竿鴻陣喚醒花英翹塵還嫩  
輓腳筵開玲瓏影  
錦屏穩鱸魚荻筍終不似萼鄉信  
隨意捉鮳陽切莫把陶潛  
錯認偷省問籬六枳歸夢甚時才準  
額黃無賴奈政好  
夕陽山映爽雲亭半卷簾波知瘦到幾家  
秋鬢  
醉譜霜颿寒韻

邁陂塘

秋海棠

淅秋魂心紅點點  
曉妝娟楚如許雲歛霞蹙  
偎芳砌恨葉情  
波無數低泣露耐風色淒迷  
亞字牆陰暮東君無主任翦  
淚爲根裁愁作朶紅顫一痕雨  
嬌春態不是華清伴侶  
夜涼銀燭勤護  
鮫綃誰搵圓姿臉碧  
顰橫波偷注儂和汝  
算瘦影檀心薄命平分取  
重門深處屬莫灑零煙停些嫩月對作斷

腸語

疎影

旅中聞鷄作

何來臙膊早驚起  
棲煙松頂元鶴一盞蛾  
鐙亂點傳籌六更  
譙鼓纔殺黃茅冷  
驛商山店有多少鞭  
絲風鐸記少年立馬  
函關邊月如盆初落  
誰道燕南朔北又吳  
頭楚尾隨分棲  
託酒力依微殘夢惺  
忪耐盡半衾寒薄自  
從翠羽催離後便  
到處聞聲都惡料今  
宵碧樹窗間定有人  
憐飄泊

南樓令

落葉

策策復悽悽  
小樓黃篋扉響空山  
舊徑都非記取秦雲  
關隴首第十起鷓鴣  
飛斜照漏微微  
亭皋一片稀再休提  
陰綠梅肥消息謝娘  
聽得否須及早換秋  
衣

木蘭花慢

寄尤二姬金陵

酒邊人去也雁絡起一天淒有嫩燭飢鼃吟莎潛蛭叫樹酸  
雞牢耶石耶滿眼問何人解唱白銅鞮欲賦郊居傳客愁他  
讀錯雌霓小姑祠屋水東西邸舍儻青溪想桃葉江空石  
橋巷小丁字簾低楊家頓家無恙定翻香小令脆於梨記否  
蕭齋風雨寒花一稜秋哇

尉遲杯

蠟梅

霜威獵誰染他吉了花紗霎天教杏子單衫付與羅浮人著  
風鬟十八想病校新妝道家恰綴苔枝無限眉山一抹鴉痕  
黃狹浮窗樞貌天然想妙墨徐熙橫幅難搗丸月籠宵積  
雲護玉未許蜂鬚偷掐倩紙閑蘆簾遮匝更醉取寒醅糟牀  
壓倚微酣椒壁初昏對訴天涯殘臘

聒龍謠

炙硯

商陸添爐都梁灼艾紫玉池蒸雲現鳳珠呵來把冰澌融徧  
穿蠡殼羊角風尖試翠墨麝丸香輭問蟾蜍那解閒愁也時  
有淚痕泣霜花緊雪花繁怕皺手擘紙薑芽還顫經生事  
業只紅絲一片算何如盾鼻磨書還博得天山傳箭勝年年  
枯守烏皮俚他冷暖

少年游

自題遊山詩卷

衝波一槳衝苔雙屐衫約綠雲香十載黃塵三生碧落搔首  
向斜陽新詩當作棲幽券歸去好商量采簪生涯牽蘿家  
計細與話鐙涼

臺城路

春寒罷繡圖爲蔣履齋亡姬雲娘作

鬢華散了香光影芳容尙畱播喏翦葉衫單堆鴉鬢嬾人怯  
嫩寒蘭榭彩霞飛也料十二層城天風吹乍一縷殘絨罥花

記否繡牀罇 曾陪捧香司硯 悵縷金衣疊紫玉煙 化大婦  
憐深書生福淺 悔不畱仙裙 把綠窗清暇 怕檢到針箱蛛絲  
塵惹魂斷春庭 梨雲門對亞

邁陂塘

王述庵少司寇三柳漁莊圖

占葦鄉鱸莊魚 菰鷺兒春漾明 縠煙波一片空濛裏 聽徧菱  
歌斷續鱗六六 諒不似鷓鴣班鷺序 長安局鑑湖一曲算老矣  
千秋四明狂客 此樂讓公獨 貂蟬事萬里存 卽諭蜀詩名  
官職都足 繭絲浮子瓜皮艇 洗了輭紅三斛 思爛熟恰一笑  
看雲蘭筍雙尖 簇煙莎獨速 儘鷗夢圓時 金鑾話罷 風皺半  
湖綠

金貂換酒

徐山民待詔重葺徐侯齋先生祠并以其  
遺像及臨危絕筆合裝素冊索題敬成此

詞

緡盡遺民表問空山茫茫甲子過來多少完卻平生臣子事  
臨去遺言草草想擲筆凌雲一笑賸有金仙盈把淚認西風  
鉛水雙瞳皎還勝似拜朱鳥草堂秋塌靈巖道有高懷南  
州徐穉替扶家廟吳苑鶯花渾無限誰問荒煙斯老共杜宇  
斜陽相弔小雅離騷情爾爾算風人心事歸忠孝零粉墨萬  
年寶

齊天樂

珊瑚女史天平攬勝圖

萬螺圍住雙珠影遙遙翠痕濃染石黛分眉山禽捉對偷覷  
壁人花管瓊田路遠問可有當時采芝仙伴尺五天低料他  
穿了望雲眼勞薪自憐鄉里累推煙唾月嬉春都嬾展齒  
封塵蘿衣胷架只把畫屏山看扁舟急辦等棹過香溪胭脂  
滙畔傲爾煙波五湖人姓范

金縷曲

徐嬾雲今宵酒醒圖

月落烏啼矣甚西風將愁吹到樽前眉底一半巫雲多半淚  
并在五更鐘裏闌不住平頭行李惱煞眠沙鷗對對問此時  
夢也醒來未雙翠袖替他曳十年失盡江湖計怕重提寶  
釵樓上粉香脂膩楊柳千絲船一隻君是離筵第幾儂想到  
燕支北地也要描情煩畫橐畫疎林馬踏霜花細同一樣愁  
滋味

臺城路

倚竹圖

碧鮮一片篴簫谷幽居個人三徑采柏歸時牽蘿補後遮莫  
斜陽寒近琅玕綠淨正掠袂西風送將秋信掩冉驚鴻俱雲  
較取瘦來影苔花料應路瑩問雛鬟何處翠袖孤另鳳子  
來無平安報否愁在飛蓬雙鬢瑤情暗警憶夢到瀟湘蒼梧

雲凝防惹秋心月高珠露冷

疎影

題倪米樓帆影圖卽送之漢口

悲哉秋氣問日斜江上望遠人幾半葉敲波八字分煙出沒  
短長亭底西風慣惹傷心眼和幾片冷雲扶起認遙遙天末  
鴻孤一髮楚山青矣欲問飄蓬詞客武昌道上柳同否搖  
曳芳草晴川整整斜斜愁在船尾船尾津梁總聽銅鞮唱怕  
欲遣秋懷無計觸相思往日鴻蹤人立小長千里

祝英臺近

蠹蝶爲何夢華賦

認蟲雕猜鳳子天巧遽如許不怕鶯捎好護墨花雨儘教竹  
素開園海苔棲夢抵八幅羅裙化去展方絮應笑案上乾  
螢僵老甚情緒書癖前身合幻采香侶誇他修到衣魚千年  
脈望算花底一生輪汝



憶舊遊

何夢華媚蘭小影冊子

迦金堂左側一笑三生鶯絮花羞冷落  
蘼蕪夢賸美人瑤怨訴與靈修芳姿尙容播  
啗班管替描愁認脈脈香芽盈盈露  
眼心上眉頭秦樓迴盼處問斜月窺檐何處簾鉤六曲屏  
風底料依然弱影綉菰風流坤靈咒他扇牒好夢倘圓鷗待  
驗取薰香春風人面無恙不

臺城路

真州汪飲泉秋隱庵填詞圖

竹西一角煙花地秋心是誰消受夢醒雲孤鐙涼蟲語拋盡  
紅兒歌豆蕉梧庭牖料山字肩寒新來添瘦潭水桃花深情  
得似个人否鄉山井華歌柳定雕瓊鏤葉賭取仙手楓樹  
紅時鱸魚賣處儂記當年被酒秋江左右想明月三分二分  
依舊好聽新聲落帆瓜步口

清平樂

題葉小鸞疏香閣眉子硯銘拓本

綠窗清課珠字畱些箇想見臨池雙黛妥照到雲漪一朵  
伊人碧海青天餘香誰試松煙勾取遊仙幽夢女牀山月初  
弦

金貂換酒

郭頻伽寒蟾貫醉卷子

西子湖頭路問能消幾番骯髒幾番淒楚千古才人傷心地  
都在斜陽秋樹只合向畫帘招處那管區區杖頭費儘無聊  
傾動青裙女傳異客此間去吳儂題徧旗亭句賸蕭然江  
湖酒病年年添取指點銀瓶少時事誤了桃花仙侶算爭似  
文君夫婿但祝茅堂補蘿穩好買春自賞零星雨醉鄉約我  
和汝

菩薩蠻

秋鎧伴讀圖爲友人悼亡作

十年鏡閣三生夢玉蟲挑盡釵頭鳳雙影讀書幃六更花漏催  
淚痕遺挂漬誰問疑難字一搵小銀釭秋宵如許長

減蘭

一丸螺黛墨瀟香痕秋意態十八煙鬟人在鴛鴦廿六間  
愁風愁水徧地楊花春去矣鏡約何年紅雨飄零滿畫船

浣溪紗

雲鬢花鈿顫步搖采蘭時候蕩輕橈關心一帶小紅橋  
烏鵲傳書香宛宛驚鴻畱影夢迢迢困人天氣可憐宵

又

葉葉銖香透薄羅自臨瀟照寫愁蛾通詞曾記託微波  
飛絮飛花芳信杳闌風闌雨好春過一生南浦斷腸多

齊天樂

汪蛟門少壯三好圖爲秦敦夫太史題

紗明凝妝鬢薄那有少年心緒綠窗無語又幾點蕭疎豆花  
涼雨別館櫻桃黯然秋思苦

小謨觴館附錄